

小

畜

集

開化圖書館

Kaichwa Library

五



開化圖書館

Kaishwa Library



開化圖書館

Kaishua library



開化圖書館

Kaishua library



王黃州小畜集卷第二十一

表

為宰臣上尊號表

為宰臣謝御書錢樣表

謝賜御製逍遙詠祕藏詮表

為宰臣謝賜御製哥詩表

為宰臣謝新雕三史表

謝賜御草書詩表

謝御製重午詩表

陳情表

謝免和御製元日除夜詩表



賀正表

謝曆日表

進端拱箴表

謝賜御製月詩表

謝賜御書字樣錢表

單州謝上表

進乾明節祝聖詩表

謝衣襖表

滁州謝上表

謝加朝散大夫表

謝賜聖惠方表



為宰臣上尊號表

內外文武臣寮具官趙某等言今月二十一日共干天聽  
別上尊名奉宸翰以未俞慮精誠而不至戴天就日猶懸  
億兆之心伏閭叩闕寧避再三之黷謝臣等聞運行四時  
者惟天之大照臨萬國者惟日之明天不宰其玄功而有  
蒼旻之號日不耀於陽德而有畏愛之名是以居廣大而  
罔辭處貞明而弗讓蓋功德著乎上而名號隨于下矣前  
王後聖茂實英聲取譬于茲其則不遠伏惟

皇帝陛下繼天而王如日之升靜則垂堯舜之衣裳動則仗  
武湯之旌鉞明堂制禮走玉帛於萬方宣室崇儒煥文章  
於三代俟氣而八風從律陳詩而萬物由庚既理定以功



成尚宵衣而旰食早以兆民愛戴群后推崇率由舊章共  
上徽號

陛下讓不得已俯而從之雖百姓同懽方諧歸美而一人  
善下終恐近名昨者法天道以流謙敷王言而如綍謂大  
道不器何假先天之言謂聖人無名豈須惟睿之說盡除  
尊號頗駭群情臣等奉詔靡遑再章請復

陛下過防滿假終未允俞守謙卦之六爻動而無悔去湯  
書之七號卑不可踰遂使中外包羞軍民沮色旣難移於  
成命乃別獻於嘉猷共傾天誘之衷用紀日新之德著龜  
叶吉蠻貊同文咸願聽卑以期得請

陛下特迂鳳藻猶避鴻名固愈振於謙光奈重違於人欲



而况皇王顯號今古彝章上則尊列聖之貽謀光輝七廟  
下則稱庶邦之係望威服八荒凡在含生共觀休烈豈可  
執勞謙之小節廢立極之大名居軒昊之至尊慕巢由之  
獨行此臣等之所未諭也

陛下之所不取也臣等不勝大願敢固請上尊號曰  
法天崇道文武皇帝庶得將順謙冲之旨惟新徽懿之名  
免使聖朝有茲闕典跼天躋地罔敢自安碎首糜軀期于  
必遂臣等無任區區懇迫之至

為宰臣謝御書錢樣表

臣等伏蒙聖慈賜御書三體字樣錢各一貫文者五銖新  
樣貨泉將布於人間三體成文筆札互彰於天縱出爐冶



而首蒙頒賜望冕旒而共積兢榮伏惟  
尊號皇帝陛下道極至玄學探衆妙宸居多暇書九府之  
錢刀御筆摘華奪三辰之文彩盡真草歐行之法在方圓  
肉好之中通流將遍於溥天固殊當百錫賚先霑於近位  
其數且千臣等傳翫爲榮收藏至寶倚天光而悚惕對聖  
作以兢慙臣無任

謝賜御製逍遙詠祕藏詮表

臣等言伏蒙聖慈賜臣等御製祕藏詮逍遙詠共四十一  
卷者伏以坐乾之教所以祛色相而示真如老氏之書所  
以去滋章而務清淨大不過四句偈多不出五千言始則  
殊途而同歸終則枝分而派別洎乎演三乘於貝葉文字



漸多編三洞於瑤函筌蹄逾遠縱人十而已百奈暮四以  
朝三自非上聖之才孰立不刊之典發揮教法允屬文明  
伏惟 尊號皇帝陛下思妙玄沙心遊赤水因民設教與  
天比崇知幾其神建皇王之有極恭默思道念釋老之多  
歧于是詮註微言詠訶至道撮其樞要闢戶牖於法門塞  
其菁英芟蕭稂於玄圃示萬機之多暇表三教之精通足  
可以指迷悞於群生扇穆清於四海豈比夫劉莊蕭衍但  
多佞佛之心漢武秦皇空作求僊之術自合鑄諸玉簡藏  
在名山將日月以同懸與鬼神而爭奧傳于不朽垂之無  
窮臣等謬列詞臣躬承聖教披堯天之雲霧已覺濡身聽  
舜殿之絃歌共知忘味謹當授持讀誦抃舞懽呼少遵善



誘之心庶助無為之化臣無任

為宰臣謝賜御製詩表

臣等伏蒙聖慈宣賜喜雨詩共三首者天時旱暵聖慮  
焦勞玄穹忽降於霄霓睿藻遂形於詩詠首蒙宣示共極  
懽榮伏惟 尊號皇帝陛下軼念三農精心六義自春徂  
夏稍致愆陽以日繫時不忘善禱詔近臣而遍走群望御  
便殿而親錄縲囚聖感玄通天心昭荅潛驅屏翳舒張東  
岱之雲暗使豐隆揭擊南山之鼓連宵泛灑率土昭蘇旱  
稼勃興豐年可望緣聖情而有作奮御筆以成篇帝庸作  
詩高視康哉之詠上以風化遠追皇矣之詩燦然三章誕  
敷四海深形教誨特有宣傳台衡宸衷之銘彼何膚淺白



雪陽春之句空衡清新臣等救旱功微賡誦調下鏤于肌  
骨敢忘作誠之詞播在管絃願導移風之德臣無任

爲宰臣謝新雕三史表

臣某等言伏蒙聖慈賜臣等新印本三史書各一部者伏  
以先帝好文校讎三史諸儒會議繇歷兩朝摸印方行頒  
宣首及中伏惟

尊號皇帝陛下心存稽古志在奉先念五帝三王之書具  
存道德思列國兩漢之事可鑒興亡觀真本之初成先近  
臣而受賜欲俾詳觀理亂起發昏蒙臣等素匪知書仰承  
善誘敢不服勤舊史少副聖懷庶竊慕於格言或有裨於  
大政臣等無任感天荷聖激切屏營之至



謝賜御草書詩表

臣某言今月五日伏蒙聖慈賜臣紅綾上御草書趙嘏南  
亭絕句詩一首絳綃半幅霞舒舞鵲之紋宸翰三行雲遶  
迴鸞之勢天恩曲被凡目榮觀佩服戰兢神魄飛越中謝  
伏惟 尊號皇帝陛下書窮八法學洞九流英斷睿謨運  
玄功而多暇飛文染翰縱草聖以為娛閑裁浙水之綾爰  
寫渭南之句宮中刀尺剪雲霧於赤城筆下風雷走龍蛇  
於碧落遍令中使宣賜近臣豈期瑣材亦預宸眷捧持失  
次傳翫增輝忻千載之遭逢極一時之榮遇讀盡二十八  
字列宿韜光宣來三十六宮天香尚在豈止藏於篋笥亦  
將傳付子孫堪笑二王非墨妙筆精之作如逢伯禹得金



簡王字之書感恩空救於涕洟受賜更銘於肌骨臣無任  
戴天荷聖激切屏營之至

謝御製重午詩表

臣某等言伏蒙聖慈宣賜御製七言四韻重午詩一首者  
天有四時成聖功也八節所以宣其氣詩有六義繫王化  
也二南所以變其風至若運陰陽享壽之功達雅頌盛衰  
之理不失其正斯惟聖人

中謝伏惟

尊號皇帝陛下運應一千啓昇平之嘉會節當重午樂長  
養之立功形于詠謠播作詩什特令中使宣示詞臣降鳳  
閣以光輝擗魚須而抃舞仰窺首句如當帝舜之薰風載  
味卒章仍念屈原之貞魄教化以被忠邪以分又何止述



浴蘭縣艾之文逞白雪陽春之麗而已哉臣等職叨掌誥  
才謝言詩獻尚書而諷諫無聞徒經嘉節學離騷而淵深  
罕究但拜宸章願揚治世之音永作傳家之寶無任戴天  
荷聖權呼抃蹈之至

陳情表

臣某言臣聞改過自新人臣之晚節弃瑕責效王者之舊  
章謝伏念臣近自冗負再叨諫署秋蘭解佩重呼澤畔之  
魂紅藥裁詩不望禁中之樹固當老於小諫日赴常參其  
如親寄解梁身趣魏闕四海無立錐之地一家有懸磬之  
憂以至僕馬龍鐘雜于工祝弟兄分散迫于飢寒若非內  
受職名賜之實俸外求差使以救食貧則曷以養高堂垂



白之親備上國燃金之費望雲就日非無戀闕之心玉粒  
桂新未有住京之計伏望

尊號皇帝陛下念臣過而能改進不因人或西垣再命於  
演綸或東魯且令於承乏唯中外之二任繫君親之一言  
干冒宸嚴臣無任僭越兢憂悃悞待罪之至

謝免和御製元日除夜詩表

臣等言伏蒙聖慈特降御製元日除夜詩四首仍令和來  
臣等尋時連狀奏謝兼乞免和今月七日伏奉恩旨特賜俞  
允者聖文絕唱天道聽卑雖違善誘之心幸獲知難之請  
伏惟

尊號皇帝陛下五行爲質六義游心樂天地之玄功奮皇



王之睿藻筆無停綴夜乃未央煥乎四章降於三館耀日月星辰之彩發金石絲竹之音思入杳冥乾坤無以逃其數辭包造化鬼神不能隱乎情其元日之句也藻繪王春悅萬物之資始其除夜之句也發揮天吏述四序之成功固宜隨歷數而頒於華夷與法令而懸於象魏俾夫薰絃播奏散爲化下之風蒼玉雕鐫祕作升中之典至若周滿黃竹之詠漢高大風之歌唐太宗守歲之詩陳叔達初年之作義皆無取事不足徵又若除夜藏鈞正朝放雀真爲兒戲豈近皇猷遍數前王實多慙德臣等文館待罪朝行具負幸觀四始之根源徒荷千年之際遇然而對燭龍之銜耀難炫螢光當鳳彩之來儀湏藏雉尾共思閣筆同樹



降旗方傾窘蹙之誠果降矜容之命豐隆門下免爲聚響  
之蚊莊叟山中甘作不鳴之鴈臣等無任感天荷聖激切  
屏營之至

賀正表

臣某言伏以元正首祚景福惟新數莫莢於堯堦初生一  
葉獻椒花於漢殿齊列千官式彰負宸之尊大祝如山之  
壽伏惟

尊號皇帝陛下業隆三代道冠百王和玉燭以授時立功  
克著振金鈴而徇路春令爰行當三元資始之期見萬國  
會同之盛方物充庭而麇君至上公獻壽以鳧趣日照冕旒  
觀垂衣之肅穆風和象魏陳縣法之威儀詎遺率土之濱



同樂履端之候膺乾納祐與天齊休臣濫奉朝恩叨權郡  
印思預華封之祝方遠彤庭新頒義氏之書空驚素髮但  
荷發生之德莫酬煦育之私臣無任祝聖戴天抃蹈懽呼  
之至

謝曆日表

臣某言今月四日進奏院遞到宣頭一道伏蒙聖慈賜臣  
至道二年新曆日一道者王春肇啓日官爰舉於舊章帝  
命遐宣守土各頒於新曆臣某謝臣聞天道無私所以運  
行寒暑聖人有作所以恭授民時聿令率土之濱共樂同  
文之化伏惟

尊號皇帝陛下五行爲質萬國咸寧星辰即序於堯天風



雨弗迷於舜麓御明堂之一十二位克正陰陽運璿璣而  
三百六旬無差晷刻煥乎正朔被于華夷臣謬典魚符欣  
開鳳曆以時以日敢忘匪懈之心卜世卜年更仰無疆之祚  
伏限郡政不獲奔詣闕庭無任感天荷聖激切屏營之至

進端拱箴表

臣某言臣聞宣尼立教陳五諫以訓民天子設官命七人  
而庭諍欲嘉言之罔伏致盛德之日新中謝伏惟

尊號皇帝陛下志在任賢動必師古大開言路精擇諫臣  
改拾遺補闕之名設司諫正言之位必須端士方稱美官  
臣且何人亦當此任三月中伏奉明詔用訓庶僚於中兩省  
之班行有異百官之督責必容寒言諤無取因循是時臣方



議迎親已諧告假

陛下矜其貧乏錫以緡錢恩深曲被於一家用度有充於千里况臣曾為縣吏每督民租為尺布斗粟之逋行滅耳鞭刑之法因知府庫皆出生靈空有淚以感恩慙無功而受賜洎再趨象魏時見冕旒猥塵書殿之資久蠹太宮之膳曾無績効空玷清華且官在諫垣未嘗有一言裨補職當史筆未嘗有一字刊修語所謂飽食終日無所用心者臣之謂矣思欲舉諫諍之職言朝廷之事則

陛下聖德昭被神功著明四輔無私而秉大鈞百姓不知而歸至化君何事哉臣何言哉然而安不忘危理不忘亂靡不有初鮮克有終古聖賢之深旨也故夏后有盤盂之



銘周王有几杖之誠敢徵斯義用導愚衷臣又嘗讀唐史  
見貞觀中張蘊古上大寶箴辭理切直太宗深加稱賞焉  
臣雖不才願繼其美謹昧死撰端拱箴一首固不足裨益  
明聖萬分之一亦臣之舉職也隨表詣東上閣門跪進以  
聞干冒宸嚴臣無任僭越待罪之至

謝賜御製月詩表

臣某等言今月十六日伏蒙聖慈宣示中秋月五七言詩  
各一首仍令依韻和來者月盈三五明天道之無差運偶  
一千見聖人之有作雖聽賡歌之命終降寡和之詞傳翫  
為榮捧持失次伏惟

尊號皇帝陛下精心六義思若湧泉銳意萬機居多暇日



當中秋之屆候翫素月之流空罷觀乙夜之書乃吟清夜  
載覩如圭之狀思繼白圭燦乎二章大哉四始頒于近位  
得遂榮觀雖酌海窺天罔知涯涘而君唱臣和親奉德音  
強率謏聞虔遵睿旨効星辰之北拱徒竭丹心誦烏鵲之  
南飛終慙雅詠顧瑕玼之難掩諒尤悔以何逃臣等無任  
訶時樂聖榮懼激切之至

謝賜御書字樣錢表

臣某等今月二十三日於學士院分賜得御書三般字樣  
淳化元寶錢者洪鑪新樣通行將遍於萬方御筆摘華神妙  
互分於八體頒宣非次傳翫知榮 中謝伏惟

尊號皇帝陛下留意貨泉精心筆札書紀年之大號用煥



錢神逞上聖之多才爰鬱墨妙盡返鵠迴鸞之法掩天龍  
地馬之名莊山歷山之金可齊重靈貝開元乾元之字莫比  
神蹤將大濟於兆民仍分霑於兩制臣等名慙夷甫才謝  
魯褒實趙囊而空荷君恩探禹穴而難窮聖作周太公之  
園法自合包羞歐率更之筆精從茲掃地永言感遇空極  
兢榮臣等無任

單州謝上表

臣某言今月九日曹州進奏院遞到勅一道伏蒙聖慈就  
差知單州軍州事兼賜錢三百貫文祗荷寵榮不任感懼  
臣已於今月十七日到本州上訖乍別天庭初臨郡印錫賚  
頗厚恩榮實多謝伏念臣本乏才名素無門地徒偶文明



之運濫登俊造之科升朝便忝於諫垣効職仍叨於綸閣  
常罹罪譴未合弃捐仰竄臬而方類戴盆遇慶赦而遽收  
墜履官復兩省之列職居三館之先俸厚於他司班清於  
庶品固合優游仙館耽翫群書常依日月之光時貢芻蕘  
之說詎唯卒歲亦可終身昨以臣父將作監丞致仕某足  
疾嬰纏年光遲暮向因謫宦深入窮山常恐此生不歸故  
里自叨赴闕頗更思鄉蓋爲衰羸動多悲感有孫兒不識  
面目有子壻未接笑言分俸則桂玉不充聚族則京師難  
住近聞館殿亦有遺差頗發家書令求外任遂瀝事親之  
懇以干孝治之朝伏蒙

尊號皇帝陛下義在從人恩推養老假之符竹惠以緡錢



居二千石之權已為望外受三十萬之賜實自宸衷感深  
而淚濕詔書戀極而魂飛帝闕即時赴郡不日迎親本州  
以臣叨奉新恩言承舊例亦將歌樂遠出郊坰臣先以文  
書並令止絕蓋以壟麥未秀村民尚飢當帝王盻食之時  
非長吏自娛之日庶幾率下不是近名况臣早忝掖垣每  
親旒宸備熟憂勤之旨飽聞淳儉之風足以宣揚聖猷訓  
導屬吏此外則詳評案牘精究簿書雖管庫以必親庶狴  
牢而無枉幸逃官謗用報聖知且念親民之官自古所重  
凡今共理亦曰難才張齊賢罷自台司止知京兆辛仲甫  
出從叅政方莅宛丘雖小大之不同在郡國而無異唯臣  
此任最是殊恩十一年前始為成武主簿九重天上曾是



制誥舍人望舊宮而雖隔雲泥過故邑而亦為榮遇所恨  
者忽離侍從莫遂朝辭實非臣心輕去輦轂但以臣父苦  
念丘樊慰懷土之心晨昏有遂望拱辰之列涕泗無從伏惟  
陛下少減焦勞俯加頤養至于堯水湯旱曆數之常文丹  
浦青丘征伐之彛事佇見斬繼遷於獨柳送蜀寇於檻車  
示天下不用干戈驅域中咸歸富壽然後鳴鑾日觀降禪  
玄亭追蹤於七十二君探策而萬八千歲此際臣之本郡  
實有行宮僅得導引皇輿掃除御路撰禮天之書冊雖匪  
職司對盛德之形容敢忘歌頌臣無任

進乾明節祝聖詩表

臣某言聞天道化成分八節而運行元氣聖人降慶膺千



年而開闢洪圖誕靈既偶於嘉辰祝壽乃名於聖節照臨  
之下禱願攸同臣某謝竊以漢感赤龍晦雲雷於大澤周  
因玄鷲帶弓矢於高禩符瑞之來今古相皇伏惟

尊號皇帝陛下二儀叶德九廟儲祥于時而里社方鳴是  
夕而常星不見孟冬建亥愛日在房紫電繞樞式表自天  
之命青雲如蓋爰標出震之期當睿聖之繼天以乾明而  
命節千官上壽萬國來庭傑侏堯離鏗越樂懸之下鬼伏  
梅伯歡呼文陛之前駿奔競効於祝堯宴樂且殊於在鎬  
臣職叨三館位列丹墀聽九奏之簫韶欣同鳥獸獻千鍾  
於堯舜幸接夔龍舞蹈之餘詠謠斯發謹上乾明節祝聖  
壽古詩三篇合七章章無定句篇有小序稍殊俗態似近



古風雖播在樂章慙非風雅或訝於壽酒可代俳優冒黷  
冕旒臣無任

謝衣襖表

臣某言今月十七日供奉官閣門祗候景元到州伏奉聖  
恩賜臣勅書一道紫欵正綿旋襖一領者臣當時與官吏  
軍員將校等望闕謝恩訖遠降王人遍頒時服捧如綸而  
增懼對挾纒以知榮中伏念臣素乏藝文猥塵清近雖罷  
金鑾之職尚分銅虎之符而自移理藩宣始踰旬浹莫著  
袴襦之詠空慙凋瘵之民此者伏遇

尊號皇帝陛下政在宵衣恩加露冕特有祁寒之賜俾無  
卒歲之虞開緘併集於榮光宣詔更增於和氣飾之瑞獸



空傾率舞之心，徵乃維鵜難免。彼己之刺，伏限權司郡事，不獲躬拜闕庭，臣無任

滁州謝上表

臣某言奉五月九日制命，伏蒙聖慈特授臣守尚書工部郎中知滁州軍州事。已於六月三日，到本州上訖。罷直禁中，臨民准上，雖離近侍，猶忝正郎。省已戴恩，旣榮且懼。臣某中謝伏念臣早將賤跡，誤受聖知。進身不自於他人，立節惟遵於直道。優游兩制，出處八年。今春召自西垣，入叨內署。旣在深嚴之地，仍當繁劇之權。雖積兢虞，終無補報。所宜遠貶以肅具寮，伏蒙

尊號皇帝陛下，曲念遭逢，俯存終始。止罷玉堂之職，仍遷



粉署之資真委以專城置于近地沿流數日登陸三程諸縣  
豐登苦無公事一家飽煖共荷君恩處之一生實為萬足  
然而翰林學士朝廷近臣

陛下登位已來御前放人之後從呂蒙正而下拜此職者  
止有八人臣最孤寒亦預其數言於聖選不為不精數月  
之間忽然罷去衆情尚或驚駭微臣豈不憂惶且臣在內  
庭一百日間五十夜次當宿直白日又在銀臺通進司審  
官院封駁司勾當公事與宋湜呂祐之閱視天下奏章審  
省國家詔命凡干利害知無不為三日一到私家歸來已  
是薄暮先臣靈筵在寢骨肉衰經滿身縱有交朋無暇接  
見不知謗議自何而興臣拜命已來通宵自省恐是臣所



賃官屋在高懷德宅中一昨開寶皇后權厝之時便欲移出未有去處甚不違寧彙曾指約公人不令呵喝切恐貴僧出入中使往還相逢之間難為顧揖按舊制自左右正言已上謂之供奉官街衢之間除宰相外無所迴避此蓋賈誦所謂人君如堂人臣如陛陛高則堂高者也况臣頭有重戴身被朝章所守者國之禮容即不是臣之氣勢因茲謝表敢達危誠况臣粗有操修素非輕易心常知於止足性每疾於回邪位非其人誘之以利而不往事匪合道逼之以死而不隨唯有上天鑒臣此志伏望

陛下思直木先伐之義者衆惡必察之言曲與保全俾伸誠節則孤寒幸甚儒墨知歸在於小臣有何不足今則隋



岸千里堯天九重微軀或遂於生還勁節尚期於死所臣  
無任

謝加朝散大夫表

臣某言今月十八日進奏院遞到勅牒一道伏蒙聖慈加  
臣朝散大夫者禮成大祀澤霈百僚豈期郎吏之卑亦從  
大夫之後臣某謝伏念臣猥因薄技獲偶昌辰自忝文科  
累叨華貫數年綸閣徒勤潤色之功百日玉堂詎有論思  
之効而自身離近侍官帶責詞既別白以無門但憂危而  
度日此者伏遇

尊號皇帝陛下圓立展禮率土推恩特加五品之資員俾壯  
一麾之任况臣早叨書命備見舊章每當行慶之時必考



授官之限未滿二載例增五階率以爲常行之自久臣去年五月出職今年二月加恩承奉郎陞級未崇朝散階遷陞不次必是上由睿聖旁出僉諧以其曾作近臣不欲便同常例永言感遇空極涕洟遂使死灰之心稍生於寒燄戴盆之首亦見於天光誓捐微軀以答鴻造無任

謝賜聖惠方表

臣某等言本月二十五日進奏院遞到太平聖惠方并目錄共一百一冊臣等當時望闕謝恩仍依勅命施行訖臣等謹按洪範嚮用五福其三曰康寧威用六極其二曰疾然則疾病之作蓋天之威沮邪康寧之集蓋天之勸嚮邪此特立教而言姑欲驅人爲善苟或飲食嗜慾之不節陰



陽寒暑之不時為札瘥為沉痾為疢贅為疔瘍若此之類  
縱而弗攻委之于極非聖哲之所用心也故醫術由是而  
生焉自黃帝岐伯以還作者衆矣以至叢平無條貫浩平  
無津涯思欲囊括古今派分類例參驗百疾稽合群方惠  
于兆民敷乃萬國非偶大聖孰能與之臣某謝伏惟

尊號皇帝陛下惟睿作聖有孚惠心包天地之大德群生  
罔不遂盡皇王之能事墜典罔不修謂人之未庶也制婚  
姻以育之謂人之未富也薄賦斂以足之謂人之未教也  
施道德以化之又欲使五福之康寧徧流比屋六極之疾  
病不加蒸民于是召良醫考異術集自朱邱逮于紫宸幾  
三十年成一百軸洞乎天人之際探諸鬼神之奧製序引



以述其事爲模印以行于時大頌四方夙出萬古昔

玄宗之廣濟德宗之廣利皆叢剟眇末不足稱道尚具載  
史籍垂于後昆以爲莫已若也况

陛下之述作功叅化源天下之惇嫠身躋壽域雖復造書  
畫卦鑽燧播時不可同年而語矣宜乎與日月同懸與經  
籍共永豈區區小郡碌碌下臣能訶頌于聖德歟當州地  
居僻左路遠京師授勅數年引頸以日累使郡吏請于有  
司始蒙頒宣蓋有次第而又今冬以來天氣稍旱過始冰  
之候河無薄澌踰小雪之期野無微霰頗慮瘡痍害于民  
人俗罕名醫病則祀鬼分憂之任求瘼是專方虞後艱獲  
此大賚謹當抽俸金以市藥給官本以救人資聖祚于無



疆流聖惠于不朽盡納淮甸歸于華胥悽悽之誠如此而  
已臣等無任 云云 遭時樂聖抃躍之至

王黃州小畜集卷第二十一

關化圖  
kuarhua rora



王黃州小畜集卷第二十二

表

賀南郊大赦表

賀冊皇太子表

謝落起復表

賀皇帝嗣位表

謝轉刑部郎中表

賀冊皇太后表

賀冊皇后表

慰上大行皇帝謚號廟號表

乞賜終南山人种放孝贈表





黃州謝上表

謝加上柱國表

謝宣賜表

起居表

賀收復益州表

賀勝捷表

揚州謝上表

請撰大行皇帝實錄表

謝弟禹圭授試銜表

賀聖駕還京表

謝加朝請大夫表



賀南郊大赦表

臣某言今月二十日降到赦書一道南郊禮畢大赦天下者臣當時集軍州官吏百姓僧道宣讀施行訖嚴父配天王者之達孝青災肆赦有國之大猷凡在群生罔不同慶臣聞有虞尚乎德祖顓頊而宗堯周人重其先帝舉而郊禘沿革之文則異祠祀之義斯同率由舊章茲曰大事雖天子必有尊也非聖人孰能行之伏惟

尊號皇帝陛下司牧黎元敦崇孝治言有父也

宣祖昭武皇帝積德而累功言有兄也

太祖神德皇帝開基而創業而自下武繼志守文則難化成而日用不知寅畏而夕惕若厲故得昆蟲咸遂戎狄允



懷文物聲明損益乎三代道德仁義寔染乎萬民有是聖  
功推功於天地有是聖德讓德於祖宗乃備嚴禋聿伸大  
報禮樂具舉宣三年之不為玉帛載馳見四海之助祭列  
聖至上上帝格思錫鴻休於無疆明大孝之不匱禮成而  
退天且不違自非吉蠲之誠達于上下孝悌之至通于神  
明孰能若斯其盛歟由是因純嘏之休覃雷雨之澤謂萬  
方有罪于是乎釋縲紲之人謂百姓不足于是乎免逋逃  
之賦照燭幽壤滌蕩瑕疪順天推恩與物更始詩不云乎  
一人有慶經不云乎萬國懽心自可追三王而比宗非止  
黜五霸而不用者矣臣出官內畧承乏專城旣不得陪冠  
劍之班行俎豆之事舞抃於黃道登降於紫壇又不得湧



非煙之詞濡甘露之筆藻繪於玉冊發揮於皇謀亦臣之不幸也然而當求治之朝居分憂之任得不導揚允澤訓戒齊民瘳其瘡痍浸入骨髓亦臣之大幸也伏限郡事不獲奔詣闕庭臣無任

賀冊皇太子表

臣某言今月二十八日降到赦書一道皇太子正位儲宮大赦天下者臣當時集軍州官吏僧道百姓宣讀施行訖禮崇儲副澤被華夷凡在含生罔不同慶臣聞帝王之道步驟殊途夏后所以傳家垂諸古典姬昌之為世子載于禮經皆所以定人心而固國本矣由三代而下實百王不刊洎乎唐室豆分梁朝草創莊宗則席未遑暖明宗則日不暇



給聯綿五姓戰伐百年重念春坊遂成闕典我

太祖神德皇帝揖讓神器司牧黎元擇上聖之才副下民  
之望人神允屬蜀獄訟攸歸伏惟

尊號皇帝陛下傳自日兄升為天子德化威伏垂二十年  
文物聲明盡合經義禮樂征伐不自諸侯始求主鬯之親  
用正副君之位斯孟軻所謂天與賢則與賢天與子則與  
子者也伏以皇太子生知忠孝性稟溫文允符當璧之祥  
宜正撫軍之重筮龜叶吉簡冊增輝而又舉洊雷之聲因  
而作解導少海之潤用以滌瑕必由舊章降此大賚綸綍  
四出銜牢一空率土普天不勝慶幸臣出官禁畧承乏方  
州目不覩朝廷之儀手不當文翰之職雖違素望實偶昌



朝伏限郡政不獲奔詣天闕臣無任

謝落起復表

臣某言本月五日進奏院遞到勅牒官告各一道蒙因落起復授臣依前尚書工部郎中知揚州軍州事仍放朝謝者喪紀爰終朝恩遽至泣血罔極悼心失圖伏以三年之喪百王不易墨纒急用本因將帥之臣屢經從公罔叶春秋之義臣頃居近職方執通喪斷恩勉副於鴻私達禮重違於素志消埃無効空增醜冒之顏日月有期俄卒禫祥之制此者伏蒙

尊號皇帝陛下舉其舊典推以新恩俾除抑奪之名曲盡哀榮之禮援琴切切痛豈忘於終天佩玉鏘鏘班尚遙於



小畜集卷三十一  
就日伏限權司藩服不獲奔詣闕庭臣無任

賀皇帝嗣位表

臣某言伏奉四月一日赦書

皇帝陛下虔膺顧命嗣守鴻圖人神有依華夏同慶伏惟  
陛下奉先思孝克已歸仁承列聖之貽謀作兆民之司牧  
重輪繼大明之照光被遐陬少海升百谷之王澤流品彙  
肆赦渙汗萬邦底寧臣逮事先朝嘗叨內署忝逢聖日權  
守外藩不獲蹈舞玉階無任抃躍屏營之至

謝轉刑部郎中表

臣某言今月六日進奏院遞到勅牒一道官告一通伏蒙  
聖慈特授臣尚書刑部郎中散官勳賜如故仍放朝謝者



聖澤大賚郎曹序遷聞命若驚省躬知幸伏念臣頃因薄  
技逮事先朝誤記姓名過有獎擢兩知制誥一入翰林報  
國之功雖無績効事君之道粗守貞方虛名既高忌才者  
衆直道難進黜官亦多始貶商於實因執法後出滁上莫  
知罪名

大行皇帝漸察非辜移領大郡方且精求民瘼少報皇恩  
期牽復于詞臣再發揮于王命不圖上玄降禍

先帝登遐奉諱之辰號天罔極不得趨朝夕之臨無以為  
臣子之心淚如綆縻悲入骨髓伏遇

皇帝陛下祇奉顧命欽承慶基荼蓼之情既遵于易月蓼  
蕭之澤遂洽於溥天爰自起曹陛下憲部望金鑾之殿誠



隔煙霄入白雲之司亦非冗散得不恪居官次虔奉詔條  
諭淮海之遺民識朝廷之新命無汲黯積薪之歎有子牟  
戀闕之心感慨舊恩追惟往事西陵目斷泣血難收東海  
日昇傾心更切伏限權司藩服不獲拜賜玉堦臣無任感  
天荷聖激切屏營之至

賀冊皇太后表

臣某言伏覩四月一日制書冊皇太后禮畢者子道大備  
母儀有光伏以皇太后德配先朝功存內治遇坤之泰叶  
易象之休徵在河之洲動詩人之雅詠克昌聖嗣續服寶  
圖爰旌十亂之功乃正萬邦之母祗膺玉冊誕受尊稱舜  
孝蒸蒸漢儀穆穆問安侍膳載趨長樂之宮含飴弄孫永



鎮顯親之殿臣限拘官守不獲蹈舞玉堦無任抃躍屏營  
之至

賀冊皇后表

臣某言得進奏院狀報五月二十四日制書秦國夫人立  
為皇后者中宮正位率土同歡臣聞軒轅四星上明于玄  
象虞舜二女內助於皇風永惟王化之基實繫人倫之本  
伏惟

皇帝陛下誕膺駿命嗣守鴻圖安上定民動循於禮法自  
家形國先正於宮闈符沙麓之禎祥取塗山之正嫡蒸嘗  
是奉既逮事於先朝車服有儀更承顏於長樂典冊大備  
邦家有光臣以任假列藩獲聞盛禮伏限恪居官次不獲



蹈舞玉堦無任抃躍屏營之至

慰上大行皇帝謚號廟號表

臣某言得進奏院狀報今月六日勅下大行皇帝謚號神功聖德文武皇帝廟號太宗七日文武百寮詣西上閤門拜表陳慰者典章大備宗廟永安臣謹按周禮太師帥瞽而廡所以作匱謚又按禮記大臣素服而郊所以明天誅蓋子不得私其父臣不得私其君爰茲考實之文用正易名之法洪惟盛典屬在聖朝

太宗皇帝知幾其神惟睿作聖功濟萬物德流八方有經緯天地之文有克定禍亂之武錄其行也既如彼定其謚也宜如此又以為極大曰太有德稱宗懋建鴻名永光清



廟禮官博士討論而無異辭公卿大夫僉諧而合舊典為百代不祧之主享萬世無疆之休伏惟

皇帝陛下以大孝顯親以至公立法率由茂實誕上尊稱太史之紀國書有光直筆上公之讀謚冊曾無愧辭終哀且榮愛禮達孝秩秩之容既肅穰穰之福無窮臣逮事先皇累叨近侍流落郡政哀號國喪執戟之官既傷於踈賤如椽之筆空入于夢魂伏限官守不獲奔赴闕庭

乞賜終南山人種放孝贈表

臣某言臣等聞陳蕃之薦五處士名動邦家田歆之舉六孝廉事光簡冊惟兩漢之制理於三代而同風復有聘以安車賜之束帛聽其不仕姑務優賢八月奉羊酒之儀四



時致宗廟之胙史之所記代不乏人爰屬昌期宜興隆典  
伏見終南山處士种放山林養素孝友脩身既聚學以誨  
人亦躬耕而事母龐公守道不入襄陽之城康伯避名永  
絕長安之市

太宗皇帝知其高尚曾示徵求恐違鶴髮之親未應鵠書  
之命讓賜錢而不受懸好爵以難縻今聞放執親之喪貧  
不能葬棺衾未具宅兆無歸臣等或忝彼交遊或慕其名  
節傷哉貧也觀茲窳窳之憂聞斯行諸豈怯匍匐之救雖  
共謀分俸而未若推恩况喪巖穴之賢敢掠朝廷之美伏  
冀 皇帝陛下特旌素履曲示鴻私少加粟帛之恩俾諧  
喪葬之禮上則成先皇之雅意下則揚隱士之清規亦足



以激浮競之風勸孝悌之俗所繫者甚大所費者至微比  
考叔之遺美一時小惠較鄭均之義穀千古同塗干冒宸  
嚴臣等無任僭越之至

黃州謝上表

臣某言伏奉去年十二月二十九日勅落知制誥差知黃  
州軍州事者通于自限尋即朝辭自後以改葬先臣蒙恩  
給假幸獲親於遠日免積恨於終天墳杵未停征輪靡盬  
已於今月二十七日到州上訖乍離近侍猶忝專城循省  
尤違彌深感泣伏以黃州地連雲夢城倚大江唐時版籍  
二萬家稅錢三萬貫今人戶不滿一萬稅錢止及六千雖  
久樂昇平尚未臻富庶永言養活亦藉循良如臣庸愚曷



副憂寄謹當勤求人瘼遵奉詔條窒塞噤訟之民束縛檢  
猾之吏敢言課最廢免曠遺况當求理之朝必為無害之  
政伏念臣叨司帝誥又歷周星既不曾上殿求見天顏又  
不曾拜章論列時事入直則閉閣待制退朝則杜門讀書  
雖每日起居實經年抱疾不敢求假恐煩醫官自後忝預  
史臣同修實錄晝夜不捨寢食殆忘已盡建隆四年見成  
一十七卷雖然未經進御自謂小有可觀忽坐流言不容  
絕筆夫讒謗之口聖賢難逃周公作鷓鴣之詩仲尼有柏  
雕之歎蓋行高於人則人所忌名出於衆則衆所排自古  
及今鮮不如此伏望

皇帝陛下雷霆霹靂怒日月迴光鑒曾參之殺人稍寬投杼



察顏回之盜飯或出如簧未令君子之道消惟賴聖人之  
在上况臣孤平無援文雅脩身不省附離權臣祇是遭逢  
先帝但以心無苟合性昧隨時出一言不愧於神明議一  
事必歸於正直愠於群小誠有謗詞謀及卿士豈無公論  
以至兩朝掌誥四任詞臣紫垣最忝於舊人白首不離於  
郎署以微臣之行已遇

陛下之至公父當辯明未敢伸理今則上國千里長淮一  
隅雖叨守土之榮未免謫居之歎霜摧風敗芝蘭之性終  
香日遠天高葵藿之心未死仰望旒宸不勝涕洟臣無任  
瞻天戀聖省已激切屏營之至

謝加上柱國表



臣某言今月二十日進奏院遞到官誥一通勅牒一道伏  
蒙聖慈特授臣上柱國餘如故仍放朝謝者禮成大祀澤  
霈具寮豈期謫官之臣亦預策勲之數伏念臣因緣薄技  
遭遇昌辰承明四入於直廬才非潤色淮甸三移於郡印  
政昧循良方俟黜幽敢期受寵今者伏遇

皇帝陛下躬修禋祀嚴配祖宗率由舊章大賚群后遂令  
郎吏亦廁勲官八柱之名實叨於茂渥一麾之任有耀於  
專城誓將冰蘖之心上答雲天之施無任感天荷聖云云

謝宣賜表

臣某言今月八日進奏院遞到宣頭一道伏蒙聖慈以臣  
先撰元德皇太后謚冊文特賜臣衣着五十疋銀器五十



兩禮畢園陵恩霑論譏伏念臣學慙稽古才不兼人際會  
先朝忝塵近侍東里子產累居潤色之司南面仲弓繼荷  
分憂之任洎逢續嗣復竊掖垣適當議雲陽之陵定昭成  
之謚猥承詔命恭草冊文深虞孤陋寡聞難當大手筆事  
雖經御覽未息兢惶今者謚冊入陵神主祔廟伏惟

皇帝陛下孝思罔極允澤下流頒厥篚之綵繒錫中金之  
器皿捧承靡措蹈舞失容儒冠之榮無以加此孝治之化  
足能感人惟覺冒榮曷知報効臣無任瞻天荷聖激切屏  
營之至

起居表

臣某言今月二十五日進奏院遞到御札一道



皇帝陛下取今月五日暫幸河北者黠虜猖狂聖人順動  
佇殲兇醜永息氛伏惟

皇帝陛下續嗣鴻圖憂勤庶政戢神武以不殺用人文而  
化成蠢爾契丹敢干天紀陵越堡障驚搖吏民王師已振  
於捷音帝命尚勞於巡幸契百姓來蘇之望是六師賈勇  
之時以鎰秤銖移山壓卵即日蕩平蕃部更無南牧之人  
守吹塞垣願作北門之狗在茲一舉未服四夷方屬祁寒  
暫勞天步臣以任居僻郡地遠行朝捍牧圉以無由仰雲  
天而積戀臣無任瞻天望聖激切屏營之至

賀收復益州表

臣某言今月日進奏院狀報雷有終奏收復益州者臣當



時集官吏望闕稱賀并告諭諸縣訖守臣不武成卒弄兵  
暫出偏師果平孤壘中謝臣伏觀益部久樂皇風慕爾王  
均敢萌逆節蓋災流於分野致盜據於城池伏惟  
尊號皇帝陛下斷在睿謨擢茲儒將雖依九伐之法特開  
三面之羅尚敢嬰城斯為迷復懼困獸猶鬪之義徵圍兵  
必闕之文縱以遁逃自今糜潰盡由聖略永淨坤維臣任  
忝頒條欣聞捷奏無任歌時樂聖懽呼蹈舞之至

賀勝捷表

臣某言今日三十日得進奏院狀報今日十二日據夏州  
路馬步軍都部署王超延州路馬步軍都部署范廷召等  
各差入內殿頭高品岑保正入內高品質繼隆等走馬齋



狀到關奏兩路大軍入賊界到烏白池會合前後一十六  
度掩殺著蕃賊殺下米慕軍主一十一人吃羅拍揮等二  
十餘人及殺下蕃賊五千活捉到蕃賊二千餘人并收到  
馬二千餘疋奪到衣甲器械二萬餘事件傷殺却蕃賊不  
知數目打奪到牛羊老小不少收到糧料草窖窳極多並  
已散與一行諸軍其蕃賊帳族舍屋並燒毀蕩盡所有蕃  
賊田苗禾穀並總收刈及踐踏淨盡其李繼遷與蕃賊並  
已潰散逃遁其諸路大軍并百姓已於今月二日並平安  
却迴各歸逐處駐泊訖皇太子宰臣文武百官於今月十  
三日入賀者臣當時集軍州官吏等宣讀告諭望闕拜舞  
稱賀訖黠虜窺邊王師出塞大殲兇醜永息祇氣凡在照



臨畢同慶快中謝臣聞姬周備塞來則擊之炎漢用兵事  
不獲已蓋為民之除害亦有國之常刑言念夏臺古之白  
翟雖居沙漠實近嶠函葦爾繼遷父稽天討養成巢穴召  
集逋逃逼脅戎人驚搔王土伏惟

尊號皇帝陛下外其夷狄念在生靈戰堂上之奇兵惜關  
中之民力以至賜之國姓改以令名位重察廉官兼保傳  
而獸心反側犬性猖狂劫掠我吏民侵陵我疆境皇威赫  
怒禁旅奔馳兩路齊攻三軍合力塵兵神速突騎龍驤疾  
雷無掩耳之期烈火動燎原之勢大小十六陣斬獲萬餘  
人積甲如丘陵殪屍滿沙磧發其積聚燔其室廬俘牛馬  
以谷量蹂稼穡而掃地足使五千深入笑李陵之無功十



萬橫行輕焚噲之虛語而况偏裨斬劓罔有子遺渠魁遁  
逃僅以身免賊氣大沮人心已離係于雙闕之前誅手獨  
柳之下止應剋日別聽吉音此皆斷自宸衷出于睿筭過  
其橫議授以聖謨故得帷幄之邊陣圖猶展沙場之上捷  
書已來歷考自古帝王料兵之速未有如

陛下者也臣去年叨書密命併直內庭批逆豎之封章屈  
王言而姑息未嘗不援毫切齒怒髮衝冠慙無將帥之材  
實忍大夫之恥今則身居郎署目覩神功感涕忻懼倍萬  
常品伏限權司郡印不獲拜舞闕庭臣無任

揚州謝上表

臣某言十一月二十四日樞密院馬遞勅牒一道至滁州伏



蒙聖慈就差臣知揚州軍州兼管內隄堰橋道事替第  
仍放朝謝取便路乘馮馬發赴移任所者臣已於十二月  
四日到揚州上訖祇奉朝僉初權藩服分憂任重謫官心  
寬感恩而涕泗無從省己而兢惶失次中謝伏以禹別九  
州斯爲奧壤唐分十道是曰大邦控淮海之津梁會東南  
之漕運當聖主求賢之日親王領鎮之初宜擇才能俾乂  
繁劇豈臣愚昧而所克堪伏念且頃以藝文獲塵科第三  
館兩制遍歷清華千載一時別無媒援由是上惟奉主旁  
不忌人比因直言頻至左官去年自禁中出職滁上臨民  
龜勉在公憂虞度歲鬢髮漸白眼目已昏但以行年未高  
不敢求退明代難遇猶思報恩顧惟善政之茂聞豈望鴻



私之曲被今者伏蒙

尊號皇帝陛下擢從小郡權位大藩雖放棄之臣君恩未  
替而要衝之地使命孔多微臣素乏家財本州元無公用  
恐因供億別掇悔尤冀聖心之察微免衆口之騰謗此外  
粗當勵力豈敢曠官况揚州雖號藩方無多戶口凡千場  
務皆有使臣臣在其中提振而已至于決斷詞訟督責賦  
租持以無私必期集事今緣奉詔急速所以不敢稽留庶  
于歲時之間別求散慢之地舉頭見日空知京闕之遙白  
首爲郎甘老江湖之上伏限權臨郡政不獲躬拜天庭無任

請撰大行皇帝實錄表

臣某言聞二帝三王之道無尚書則泯而不見戰國秦漢



之事無史記則滅而不傳能使後之視今猶今之視古者  
書史是賴中謝伏以

大行皇帝功濟萬物道高百王誕敷皇謨勤恤黔首憲章  
軍國之務經制郡縣之權故得百萬之師如臂使指億兆  
之衆推心致腹而又禮樂刑政之盛聲明文物之光煥乎  
爛然有足稱述附于二十一年行事而王道備矣伏惟

皇帝陛下以奉先之孝副知子之明紹膺丕圖惟克永世  
極前即位天下宅心社稷人神罔不依附華夏蠻貊罔不  
駿奔斯乃先帝之貽謀得

陛下之聖嗣乾坤交泰日月重光歷考近古立儲闡承帝  
位未有如我朝之盛者也臣愚以為宜撰大行皇帝實錄



垂之不朽况盛德大業簡冊具存鴻儒碩生臺閣皆是豈  
臣孤陋敢有覬覦然念臣太平興國五年徒步應舉再就  
御試遂登文科服勤州縣揚歷四考先帝採摛紳虛譽自  
長洲令徵爲左正言帖直史館明年轉左司諫知制誥出  
入中外十有三年進不因人退無顯過永惟知己之至未  
得殺身之地今陵寢有日論譔是資儻得措一辭于帝典  
之中畧一名于國史之後臣雖死之日如生之時至于褒  
善貶惡之文編年紀傳之例備嘗探討粗見指歸况端拱  
元年春季日曆是臣編修如蒙帝俞不辱君命臣無任懇  
悃之至

謝弟禹圭授試銜表



臣某言臣禹圭昨差押本州賀登寶位進奉伏蒙聖慈特授將仕郎試祕書省校書郎者千年遭遇九族輝榮中謝伏念臣出自孤平猥叨班列雖累居近侍而未免食貧言念禹圭臣之母弟素無文性早使專經重以先臣惜其幼子本期擢第以慰慈顏自後住舉六年丁憂三載漸及強仕未有出身今者伏遇

皇帝陛下續嗣寶圖誕敷文德凡居守土之任義合駿奔因命在原之親入修職貢伏蒙

陛下舉先朝之故事推出震之殊恩俾列官常仍居讎校起家之調曲荷於生成報國之心同期於死所伏限郡印不獲蹈舞玉階臣無任感天荷聖激切屏營之至謹奉表



陳謝以聞

賀聖駕還京表

臣某言今月十六日進奏院狀報正月二十三日大駕還京者犬戎逃遁鑾輅凱旋

中謝伏惟

尊號皇帝陛下奉承祖宗威懷戎狄但懋守文之德靡矜神武之功蕞爾林胡無名內侮蜂屯烏合鼠竊狗偷必想邊民奪梃以毆攘亭長持繩而繫縛豈勞車駕遠涉山川陛下念二聖臨朝每經營於河朔屬三時不害乃巡幸於沙場存問耆年勞來疆吏有征無戰陳詩觀風邊人識龍鳳之姿胡馬避虎貔之衆昔周宣薄伐獫狁深入太原漢武斥逐兜奴遐臨瀚海頗為勞弊尚著聲時曾未若



陛下仰順天時俯從人欲出狩適當於冬隙班師未廢於農祥端居紫宸飲至清廟穀兩方霈春華正繁捧觴長樂之宮錫宴上林之苑皇權大洽天步永安易曰聖人以順動則刑罰清而民服孫子曰不戰而屈人之師善之善者也其是之謂乎臣方在謫官無由扈從旣不得草頡利可汗之露布又不得荅冒頓單于之慢書當文士有爲之時處山州無用之地迎鑿莫遂望闕彌深無任歌時樂聖

謝加朝請大夫表

臣某言今月十三日進奏院遞到勅牒一道中書劄子一封伏蒙聖慈以臣預修

太祖實錄特授臣朝請大夫仍賜絹五十疋銀五十兩者



陞級清崇錫賚優厚恩生望外事繫宸衷仰戴寵光伏增  
戰越臣中謝伏念臣素無望實久玷清華訓誥典謨罔知  
體要春秋禱杙豈識指歸去歲伏遇

尊號皇帝陛下詳觀國書追念始祖顧復不祧之廟光揚  
納麓之勲以為自昔編修或多漏略永懷丕烈深軫孝思  
謂漢祖元功立紀于武帝之世神堯實錄重定于高宗之  
朝爰詔近臣再編茂實臣叨膺是選尤愧非才尚賴宰臣  
李沆監修錢若水總領其職臣則討論遺事潤色舊文始  
則合秦趙世家得國姓之根本考唐杜氏族見太后之源  
流凡所改更皆有按據庶彰帝業以副天心方施汗簡之  
勞遽有分符之命無由別白但積憂危加以年髮漸高郡



封甚僻野鳥閑暇潛窺賈誼之容江魚唼喁欲噬靈均之骨  
未知何日再覩天光豈謂大典初成群賢進御

陛下以臣曾施翰墨曲記姓名俾進階資復援恩例絲綸  
渙汗金帛輝華州民改觀謫官增氣領郡城而兼史氏何  
異唐賢奉朝請以爲大夫榮同漢制非小臣稽古之力乃  
陛下好文之心涕泗縱橫亂於縻綆神魂飛越若在煙霄  
唯知遭逢曷可報効然念臣業文之外蔑有器能知命之  
年別無嗜好才思未減筆力尚雄馳于文翰之場猶能識  
路責以循良之政恐悞分憂儻用所長期不辱命臣無任



王黃州小畜集卷第二十二

介

考

圖

化

開

ka hua tuor ar



王黃州小畜集卷第二十三

表

王禮成

賀冊尊號表 已下皆代趙侍中作

謝降御札表

賀雨表

賀雪表

賀罷謁廟大禮表

賀御樓肆赦表

慰公主薨表

乞歸私第養疾表

為乾明節不任拜起陳情表



乞差官通攝謁廟大禮使表

求致仕表 四首

讓西京留守表 四首

謝降御札并宰臣就第傳宣不允陳讓留守  
乞候病愈日赴任表

謝許肩輿入內表

謝宣差長男送赴西京表

謝宣旨令次男西京侍疾表

賀冊尊號表 已下皆代趙侍中作

臣某言伏奉去年十二月二十四日批荅允百寮所上尊  
號內四字今年正月一日御朝元殿受冊禮畢者日新盛



德讓茂實而不居天啓群心上尊名而得請事光簡冊慶  
洽華夷中謝伏惟

尊號皇帝陛下受天靈符作民司牧元元本本咸臻富壽  
之鄉戰戰兢兢未減焦勞之念一昨特頒鳳詔盡省鴻名  
謙冲之道彌光推戴之心安仰百辟請仍於舊貫睿眷不  
迴三章別上於新名宸聰見納尚以為法天之義可以體剛  
健而奉高明崇道之名可以守虛無而務清淨見帝皇之  
自下却文武之大功俯順萬邦作程百代粵茲元日誕受  
徽章冊鏤乾文愈見流謙之道禮成帝錄更隆卜世之基  
臣權列上合得觀盛事伏限未任拜起不獲稱慶朝堂

謝降御札表



臣某言今月二十二日夜伏蒙聖慈特降御札云云者驕  
陽作沴乃相臣調燮之倦乙夜飛文見聖主焦勞之旨引  
過咎以歸己教刑政以留心捧讀驚慙不遑啓處謝伏惟  
尊號皇帝陛下為民父母受天聰明覃恩而已滅祗星轉  
禍而尚憂時雨側身修行自符雲漢之詩盱食宵夜莫有  
華胥之夢特形宸翰備見天心恨不自作犧牲何止靡愛  
珪璧諒至誠之所感致甘澤以非遙臣備位台司親承睿  
旨若歲大旱多慙傳說之才謂天蓋高必聽湯王之禱未  
蒙冊免尤愧搢紳而又誨以政刑敢不勤于夙夜少助憂  
心之意庶成澍雨之期伏限脚膝未痊不獲拜謝闕庭

賀雨表



臣某言伏覩今日日甘雨大降宰臣呂某等便殿稱賀者  
自秋以來時雨不降遇災而懼至誠爰禱於上玄有感則  
通甘澤忽霑於下土豐登有望朝野同懽中謝伏惟

尊號皇帝陛下七政咸濟五行爲質夤畏昊穹之命焦勞  
刑政之源一昨祇誓告災豐年失望宿麥播而未茁旱雲  
垂而不霑陛下靡愛斯牲徧走群望降廷臣而決獄御  
便殿以錄囚御筆搗文乙夜引萬方之罪清詞瀝懇經旬  
祈五福之宮惟德動天而天不違至誠感神而神授職向  
夕而月離于畢崇朝而雲上于天散絲徧灑於焦枯比屋  
重興於耒耜豈止小康之兆將書大有之年堯眉舒八彩  
之顰免貽臣辱舜樂復九成之韻大悅民心凡在含生同



知大賚臣爲霖寡術和鼎備負方期冊免之文以塞變調  
之咎處台司而愈愧荷聖感以彌深伏限未任拜起不獲  
稱慶朝堂

賀雪表

臣某言伏觀今日九日臘雪應時宰臣呂某等便殿稱賀  
者伏以臘者四時之暮所以成歲功雪者五穀之精所以  
滋農畝實上玄之垂祐表聖主之憂民凡在昌朝共欣嘉  
瑞中謝伏惟

尊號皇帝陛下勤勞庶政欽順天時因百姓以爲心思躋  
壽域慮一夫之不獲常若納隍而自秋徂冬密雲不雨  
陛下念兆民之稼穡憂七廟之梁盛徹金石於堯軒減葷



羶於舜甑而又京師之內鰥寡之徒大頒金帛之資用拯  
飢寒之累靡神不舉有感則通遂令六出之祥大副三農  
之望連宵委積徧野霑濡彰聖德以彌光書有年而無愧  
臣方居假告忽覩休祥雖慙調燮之功但樂豐登之望

賀罷謁廟大禮表

臣某言伏覩御札示諭内外文武百寮以慧宇之祇特罷  
八月二十四日謁廟大禮仍擇日御丹鳳樓肆赦者清廟陳  
儀玄穹示誠引萬方之罪皆在聖躬退三舍之祇佇光帝  
德凡居覆燾盡仰休昭 中謝 伏惟

尊號皇帝陛下夤畏上玄祇嚴列聖垂象忽呈於恠異惟  
馨香罷薦於祖宗灑宸翰以飛文出綸言而引咎仍行赦宥



用答穹旻九土編氓盡聞哀痛之詔三邊戍卒頓減訶咎  
之聲佇見立德升聞至誠感應五緯變連珠之狀載耀乾  
文萬邦傾執玉之誠同扶帝業臣父叨輔弼備熟憂勤慙  
非伊呂之致君但仰禹湯之罪己歡呼抃蹈倍萬常情

賀御樓肆赦表

臣某言伏覩今日某日 皇帝御丹鳳樓大赦天下者謫  
見上玄乃降責躬之詔澤流率土仍推作解之恩凡在照  
臨同深慶賴 中謝伏惟

尊號皇帝陛下順考古道觀乎天文有年將謝於祖宗玄  
象忽垂於躔次遂停吉禮用慰咎徵慮庶政之闕修欲普  
天而流惠樓開丹鳳大昭引咎之誠竿揭金鷄咸與自新



之路幽明靡間圉圉皆空人心已作於頌聲天道頓迴於和氣佇觀符瑞用荅憂勤臣年在衰殘功虧瘳理冊免尚稽於舊典禦災但仰於新恩愧畏兢虞罔知所措

慰公主薨表

臣某言今月某日得進奏院狀二十一日某國公主薨者雲愁魯館風咽秦簫駘鸞轡以飈馳慘龍頭而雪泣中謝伏以某國公主自天鍾秀稟聖含華聲詩早詠於肅雍選尚遂從於釐降行舅姑之禮克表人倫宜公侯之家誕彰婦道豈謂瑤臺促召玉樹先摧星沉而婺女難留月晦而常娥不見伏惟

尊號皇帝陛下悲深天性痛極皇枝歎媯汭之逝波空驚



長往望沁園之荒土無復歸寧凡在人臣共增悲悼臣限  
拘留務不獲陳慰闕庭

乞歸私第養疾表

臣伏念臣久廢常朝將臨聖節紫宸咫尺難獻壽以捧觴  
黃閣優閑但備負而調鼎不歸私第實玷公朝是以輒述  
懇誠形于章奏伏蒙

尊號皇帝陛下曲垂敦諭未賜聽從念疇昔之遭逢存始  
終之寵遇聖慈雖厚公議難安況廊廟具瞻台衡重務固  
當夙夜匪懈朝夕論思豈有半年之間殊無一拜之禮外  
論恐傷於冒寵私心未免於懷憂伏望

皇帝陛下俯察衰殘更容假告庶藥石之有效俟筋骸之



稍康盡瘁匪躬尚更期於晚節懸車告老敢輕議於明時  
儻遂允俞不勝懇願

為乾明節不任拜起陳情表

臣伏念臣向嬰羸疾久免起居顧聖節以將臨候天顏而  
尚阻在百辟具瞻之地合展禮容當千官獻壽之時未任  
拜起載循衰朽但積兢憂

中謝伏惟

尊號皇帝陛下甲觀儲祥華封祝聖萬邦玉帛俱傾就日  
之誠五等公侯共樂後天之壽凡居履壽熟不禱祈况臣  
首冠台司曲承天眷曳履方艱於步武捧觴實阻於懽呼  
有禮則安考格言而是懼無德而祿召厥疾以收宜空存  
善禱之心願恕不良之足筋力為禮雖臨几杖之年股肱



惟良深愧搢紳之論臣無任

乞差官通攝謁廟大禮使表

臣虔傾丹懇仰達紫宸載三雖黷於聖聰萬一冀迴於天  
睽伏念臣遭逢昌運忝竊台司三十年將相之權周旋備  
位一千載君臣之分終始無渝而自秋夏以來脚膝無力  
免常參於紫殿預大政於黃扉伏遇

尊號皇帝陛下告謝豐登祗嚴宗廟既列三台之首合居  
五使之先顧筋力之不支慮趨踰之失度輒伸悃悃冀免  
遣差豈謂陛下雖念暮年猶敦後事猥將大禮責在老  
臣加以中使太醫旁午於道路王言御札稠沓於門庭認  
睿旨之丁寧豈自圖於安逸受已行之命焉敢固違在臨



事制儀尚期通攝是敢預陳危懇上禱宸嚴庶於行事之  
晨免致乖儀之咎

求致仕第一表

臣某言臣聞知進知退賢達之格言有始有終君臣之大  
義將染乞骸之疏猶馳就日之塊奠仁主之憫嗟遂老臣  
之休退中謝伏念臣比乏宏材且非世胄鄧仲華之素望  
不過功曹岑文本之初心上于縣令偶以遭逢景運攀附  
先皇擢自賓從驟居相輔捐軀誓命不後他人任重才輕  
終無成績洎盟津之出將遇代邸之興王駿奔北闕之前  
備位東宮之列臣此際已能知止便拙言終焉豈期

陛下軫念青氈重升黃閣但奉文明之教令曾無啓沃之



謀猷適後 陛下察以兢持均其勞逸連鎮襄鄧暫遠唐  
虞節旄夕竊於寵榮寒暑漸成於衰颯前歲幸遇

陛下躬事上帝親耕千畝之田老臣位忝諸侯合預五推  
之禮請朝天闕尋奉帝俞得伸助祭之誠實有分司之望  
陛下過私天眷復列上台既責重以位高果積憂而成病  
今春始于微恙遂至沉痾 陛下終賜哀憐多方治療痊  
平未幾步履猶艱自茲特允常朝仍司大政無一言以裨  
聖聽無一拜以覲天顏在中書則省吏扶行着看朝士歸  
私第則鳴騶前導恥見都人已為廢疾之身曷稱具瞻之  
地近因歲暮轉覺形羸雖云告假之中仍列鈞台之上存  
問頻勞於聖慮優容是玷於公朝况宰臣一月之俸金乃



下位數年之祿食君恩雖厚數有國之彝倫內府雖豐耗  
生靈之膏血苟不思止但冒寵光豈惟辜負聖知直恐招  
延鬼瞰伏望 陛下聽其告老惠以歸全庶于瞑日之前  
少遂安身之計示君恩之有卒使賢路之無妨必也辭榮  
許歸西洛幸而未死獲見東封免令就木之年更取伐檀  
之刺尚慮 陛下過存念舊便斷來章雖犯嚴誅當期必  
遂限以尚艱步武不獲躬拜朝堂謹遣次男六宅使承煦  
詣東上閤門拜表陳乞以聞

第二表

臣某言今日日拜章上閤告老懸車優詔未俞雖增寵遇  
殘年無幾須至哀鳴縱獲戾於違天冀退身而得地中謝



臣聞葛亮蜀之名相以二十罰而傷神裝度唐之鉅賢始  
四十歲而髮白或成衰促蓋積憂虞况臣非武侯之才能  
無晉公之智略然以遭逢先帝際會聖君塵重位者三十  
年處浮生者七十載雖無功名報國常以畏慎周身衰老  
若茲死亡無日未解弼諧之任頗傷公共之朝但冒寵於  
三台終取笑於千古是以懇求致仕適合舊章

陛下曲存始終過有敦諭聽自天之成命雖沒地以知榮  
其如老病彌加死期非遠况廟堂三入貴極生人尸素萬  
錢罪招陰譴與其速之以斃曷若優之以生伏望

陛下惠以考終致之散地冀延餘息尚見明時感聖主於  
生前從先臣於泉下幽魂無愧朽骨有光區區之誠實望



于此

第三表

臣某言臣屢上封章請還朝政繼蒙批荅未賜帝俞七十  
懸車于禮文而非遠載三則黷考易象以懷憂念老病之  
日加冀皇慈之見憫中謝臣聞老氏玄言誠于知足箕子  
洪範福尚考終臣雖至愚竊慕茲義况才非王佐位極人  
臣出則擁上將軍之鼓旗貴居方面入則佩大丞相之印  
綬首冠台司三代有贈官諸子居貴仕俸祿錫賚聚之則  
何啻萬金官爵階勳數之則無非一品日有秩酒月有殮  
錢奉此一身已踰二紀外不能出奇畫策廓氛祲而偃干  
戈內不能阜俗安人救博慈而躋富壽玷聖朝之公道為



陛下之私人齒髮衰殘形骸病弱此而不退是謂無狀向  
者祇慧忽生亢陽斯久天怨神怒實為老臣引咎責躬翻  
勞聖主今幸時雪大降豐年有期多慙燮理之功全賴文  
明之感 陛下復頒詔旨盡去尊名臣則兼八字之功臣  
處三台之上列當萬乘焦勞之日為一生尸素之人縱免  
國刑必招陰責臣所以號泣求退朝夕不安者正為此也  
伏望 陛下察由衷之危懇行冊免之時文庶延風燭之  
年獲盡雲龍之分若一旦溘先朝露尚秉洪鈞則埋骨泉  
臺幽魂負愧書名國史後嗣何觀瀝懇披肝期于得請

第四表

臣某言自今月五日至十四日三上封章懇陳致仕伏奉



十七日批荅不允令斷來章者伸告老之誠實當暮齒拒  
已行之命合受常刑與其冒寵以招殃不若違天而獲戾  
中謝臣聞上天之育萬物各使得其時是以春則發生秋  
則肅殺示有成也明君之馭百官各使得其所是以壯而  
入仕老而懸車明有終也敢徵斯義以導危誠伏念臣遭  
疾彌深殘年非永聖主不能載造神醫不能有瘳自料此  
生必難報國惟當明代早遂退身繼有哀鳴固非飾詐况  
去年十二月二十三日

陛下幸臣私第見臣病容以至金口憫嗟重瞳霑泣臣此  
際潛忻得退志在不疑始望一表見俞豈謂三章未允曲  
形敦諭過念遭逢雖戀聖明其如病廢臣今日暮途遠居



常待終氣羸則藥劑無功手顫則粥杯難把謂出納惟允  
臣則蹇澁于言詞謂股肱惟良臣又艱難於步履衰殘之  
狀備對天顏尸祿之愆累煩聖聽實謀歸骨詎敢要君鄙  
志不移有死而已

讓西京留守表

臣某言自今月五日至十五日四上表章懇求致仕伏覩  
二十一日內降白麻伏蒙聖恩授臣守本官兼中書令行  
河南尹兼功德使充西京留守者繼上封章乞歸骸骨未  
行冊免忽用保釐顧殘年而氣若尸居聽成命而魄疑天  
奪微軀殞越舉族憂虞中謝臣聞掌王八柄是為生殺之  
權分務兩都實總居留之地顧惟老朽曷稱崇高伏念臣



出自孤寒本非俊傑久處秉鈞之任止因開國之期常依  
託諸侯三十五未諧釋褐洎遭逢明主六十九尚占台司  
固無經國之謀猷但享逼身之富貴上辜聖德果有天殃  
自遭沉痾已踰新歲啓手足而能餘幾日爲股肱而深負  
明時是以泣血濡毫呼天抗表願罷萬錢之俸預營五尺  
之墳盡是哀鳴固非飾詐豈謂 陛下過私天眷復降徽  
章別開荀令之池俾守周公之宅荷君親終始之分近古  
殊無守宮闕宗廟之司非才莫可况臣手不能運足艱于  
行苟聞命以不辭是捨輕而即重前求罷相皆是欺天不  
惟受君子之誅兼恐取樵夫之笑有死而已臣不敢當伏望  
陛下憫念桑榆寢停綸綍放歸私第明告公朝則老臣知



止之榮歿而不朽

陛下有終之惠于義何如伏表叩頭淚血俱下

第二表

臣某言今日某日蒙恩授臣某官臣當日上表陳讓伏奉  
批荅未允者留司重任垂死殘年聞命不遑拜章陳讓未  
迴宸眷恐速天殃夙夜以來神魂飛越中謝伏念臣去年

春季即染沉痾今歲正初方求致仕非不眷戀明代蓋憂  
逼近死期述度德量力之心減尸祿素餐之咎所望盡停  
厚俸高謝台司隨太平之老農作皇家之舊相是為大願  
夫復何求豈期陛下特委居留仍加官秩改功臣之懿  
號付大尹之劇權雖荷皇恩實乖素望且念臣之富貴天



下共知臣之衰羸陛下具見肯因休退復取寵榮况西  
都事繁中分邦政留守祿厚十倍宰臣臣若受之是無狀也  
豈止冒榮於當世亦將取笑於後人平生無致主之功臨  
死有要君之罪此臣之所必不為也若以拒違成命冒犯  
嚴誅視死如歸期不奉詔伏望

陛下存退人之大體割念舊之小慈賜以安車期于就木  
雖死之日猶生之年

### 第三表

臣某言臣自聽宣麻載陳讓表伏奉荅詔今斷來音顧老  
疾之嬰纏荷聖恩之稠沓因辭榮而受祿是冒寵以沽名  
泣血慙魂下遑啓處中謝伏念臣去年抱病久在中書上



有萬乘聰明下有三臣輔弼臣安則畧勅困則高眠尚多  
虛羸不任來往而况兩京分務百職具存七世之廟甚嚴  
萬夫之政斯在既非卧理之地尚增尸祿之尤且三千貫  
之俸金數百家之賦調奪其膏血奉此衰殘雖曰優臣以  
恩乃是速臣之死興言及此苟活何為臣又見前代退人  
自有常禮或以師事之舊或以定策之勲亦不過賜以千  
金與之駟馬而已臣之富貴止是遭逢有位無功既老且  
病放歸私第何負于臣豈煩朝廷過作禮數伏望  
陛下容其告老察以由衷俾諧知足之心盡寢已行之命  
朝退夕死臣無恨焉

第四表



臣某言臣伏奉今月某日第三道批荅不許臣陳讓恩命  
令斷來章者上言則是拒命受寵則是要君憂惶失圖進  
退無據中謝伏念臣累陳危懇未動宸衷實慙老病之身  
不稱保釐之任萬端憂悸三表哀鳴

陛下累降綸言兼貽御札且云開國勲舊惟卿一人又云  
頤養洛陽事光青史伏讀 聖語泣顧殘骸恨不能追已  
往之年華換已廢之筋力奔走上道應副天心其餘步履  
艱難言辭蹇澁不求致政是謂貪榮安有始則讓三百貫  
料錢終則受三千貫月俸必若均于庶吏可給數百貫分  
于六師可養數千輩或使安民布政或令禦寇備邊割老  
臣之私恩成 陛下之公道亦恐增臣微福減臣餘殃因



之剩活數年必得載見萬乘若須令赴任不許罷官尸素  
轉多憂勞速死恐無益也適足苦之伏望

陛下思一物失所之言察匹夫不奪之志寢茲成命俾遂  
初心則長往九原免有冒榮之恥更生一日亦蒙載造之  
恩

謝降御札并宰臣就第傳宣不允陳讓留守乞  
候病愈日赴任表

臣某言今日日伏蒙聖慈特降入內小底押班韓守英載  
賜御札當日晚宰臣呂某已下至臣私第奉宣聖旨重疊  
示諭兼再賜批荅不允臣陳讓恩命今斷來章者宰臣諭  
旨中使傳宣宸翰丁寧雖難封執殘骸衰備實不支持若



伏枕堅拒於君恩飛章更煩於聖聽為臣之道實不自安  
稍俟有瘳以膺成命謹當徧求良藥精療沉疴懇願未聞  
憂惶失次

謝許肩輿入內表

臣某言二月日准樞密院劄子奉聖旨許臣過清明節選  
日朝辭仍令乘檐子於崇政殿入見者老病衰羸聖慈憫  
惻察其足疾聽以肩輿實君父之殊私非人臣之常禮昔  
蔡義授經於宣帝則兩吏扶以趨朝裴寂納命於太宗則  
三衛昇之入覲臣無此勳舊有此寵榮自知殺身無以報  
主兢惶涕泗不知所裁

謝宣差長男送赴西京表



臣伏奉宣命差臣長男左羽林軍大將軍承宗送臣赴西  
京者自天有命舉族知榮慰其父子之情益見君臣之分  
伏念臣比慙衰老未遂歸休明君重委於保釐方憂曠位  
長子幸叨於環衛合預常參

陛下輟自班行許隨行李出于聖念實耀私門岐路有光  
室家感泣獨親獨子既有玷於公朝盡孝盡忠豈敢忘於  
家訓永言感遇空極涕洟

謝宣旨今次男西京侍疾表

臣某言今日日樞密院送到宣頭一道付臣次男某令隨  
臣赴任西京侍疾仍不落請受者君親厚遇父子偕行祇  
荷寵榮彌增感泣臣近以將之洛邑入覲堯塔少傾戀闕



之心併寫感恩之抱沐聖君之發問許幼子之侍行不落  
班行仍支俸給實非常例並出特恩想暮齒以知榮顧私  
門而積耀此蓋

陛下義敦天性恩厚孝思念黃髮之衰羸俾彩衣而侍養  
老夫耄矣罷相輔而忝居留童子何知奉晨昏而兼內職  
唯於忠孝以誓言子孫過此以還不知所措

王黃州小畜集卷第二十三



開化圖書館

Kaishua Library

小百集卷三十三

三

三



王黃州小畜集卷第二十四

表

西京謝上表

謝聖惠方表

謝手詔別錄賜生辰國信表

謝傳宣撫問表

為壽寧節不任朝覲奏事狀

奏姪男表

謝賜姪男大理評事表

繳連壽寧節功德疏表

代呂相公讓起復第二表



代王侍郎讓官表

代呂相公讓右僕射表

為宰臣以彗星見求退表

又謝恩表

為兵部尚侍郎謝恩表

為溫侍郎謝除禮部尚書表

為兵部張相公謝官表

為史館李相公讓官表 二首

西京謝上表

臣某言伏奉恩制授臣西京留守已於今日到任上訖  
乍遠龍庭初臨龜洛望冕旒而積戀對宮闕以知榮伏念



臣素乏宏才偶逢開國歷兩朝而竊祿叨三入以無功去  
歲因染沉痾懇辭重位抗表止期於致仕出綸復委於留  
司四上讓章願罷已行之命載蒙荅詔未諧往訴之誠慮  
堅卧以要君遂力疾而受命此蓋

陛下情深念舊禮極退人遂令衰朽之年享此殊常之事  
入則榮提相印冠四輔以調元出則分務神臯守三公而  
在外仍啓荀池之貴彌彰洛宅之雄增老臣無德之歎實  
近古未行之典未言寵遇無與比倫而自感泣朝辭扶力  
上道乍臨理所彌耀殘年奉列聖之宗祧覩百司之典故  
對兩觀而寧忘戀闕俯三川而更切朝宗謁

太祖之園陵魂銷弓劔掃先臣之墳墓淚滴松楸念往追



思既榮且懼惟慙潦倒不稱居留亦當虔奉朝經旁詢屬吏卧治上憑於聖化求醫庶便於微軀固無裨補之功但感始終之道

謝聖惠方表

臣某言今日得進奏院狀報十日准御書院劄子奉聖旨降太平聖惠方第五十一卷至一百卷并排門目錄一卷共五十一冊並用紫綾裝襖黃絹作簽仰進奏院遞到西京賜臣者宸眷曲迴上方新製聖惠本霑於黎庶天慈續賜於老臣欲令病廢之軀再獲康寧之福中謝伏惟尊號皇帝陛下與世作範視民如傷窮百病之根源選十全之方術爰自宋邸逮于紫宸垂十五年成一百卷救疾



病疴瘍之理盡金石草木之情莫不岐伯秦和獻其伎術  
倉公扁鵲奏其方書辨五聲五色之微察九竅九藏之動  
御製別加於序引生靈咸識於指歸笑玄宗廣濟之方一  
何太簡繼黃帝親嘗之理千古同輝頃以模印未全施行  
不廣臣方居黃閣首被鴻恩常恐此生不見全集豈謂  
陛下曲存終始再有頒宣窺天愈覺於高明觀海莫知其  
涯涘惠過反魂之藥功深起歷之鍼進奉謝恩恐自殊於  
方鎮拜章叙感猶竊比於台司更延遲暮之年寔自生成  
之德臣無任感天荷聖激切屏營之至

謝手詔別錄賜生辰國信表

臣某言今日日伏蒙聖慈差臣男某官押賜臣生辰者天



眷廻光私門積耀方動劬勞之感忽承睿聖之知舉族爲  
榮百身何報伏念臣才非兼濟運偶重熙一言無補於宸  
聰三入徒塵於相位向以虛羸造疾筋力不支優容猶列  
於上台拜謁不拘於常禮死難塞責方期伏枕以上立早疾  
旣有瘳亦合懸車而告老尚戀文明之德冀伸補報之心  
豈謂 陛下特記生辰曲廻睿眷衣龍襲六宮之製器分三  
品之珍出鞍馬於內閑分綵繒於天府惟慙老朽不稱鮮  
華無褐無衣益負下民之媿有始有卒空知上聖之恩惟  
思苦口之言以盡致君之節過此以往莫知所爲

謝傳宣撫問表

臣某言臣男某押生辰國信至伏蒙聖慈召赴宗政殿面



傳宣示撫問者俯聽聖語如對天顏涕泣感恩兢惶失次  
伏念臣遭逢有素功業無聞亦嘗潛數昔賢略徼近代劉  
仁軌處保釐之任功著征遼裴晉公兼將相之權勲高伐  
蔡稱爲國老不愧後人臣無此勤勞有此名位未諧休退常  
負憂虞豈意生辰尚關聖念特垂寵錫俾耀衰殘詞臣草  
詔於玉堂已循往例家子授宣於金口事則非常萬死百  
身終難補報無任涕咽感恩之至

爲壽寧節不任朝覲奏事狀

臣伏念沉痾未愈聖節將臨顧筋力以不支望雲天而積  
恨旣乖脩覲莫敢寧居竊以臣自偶昌朝夕叨貴仕入則  
位崇於三事累玷台司出則名冠於諸侯謬塵居守凡關



慶賀皆合率先而况壽寧嘉辰節名新改當百辟稱觴之  
日是二年伏枕之餘歷夏經秋有增無減莫預懽呼之會  
僅成病廢之身天邊空仰於流虹牀下尚迷於鬪蟻傾堯  
日而雖同葵藿通虞泉而自念桑榆遐瞻北極之光恨無  
迅翼善禱南山之壽但有精誠臣無任祈天祝聖激切憂  
惶之至

奏姪男表

臣前件姪男某早慕通修比求科試既未精於舉業難輕  
入於文場尋以奏授朝恩補充衙內隨從已經於三任蹉  
跎遂滯於一名况四房昆弟之間唯有此姪念千載君臣  
之分恐失良時儻蒙甄錄之恩粗有公勤之誠干犯宸扆



無任兢惶激切之至

謝賜姪男大理評事表

右臣伏蒙聖慈授臣姪男某大理評事者祇荷寵光不任榮懼伏以法寺美官聖朝好爵凡去選授必擇器能豈期不調之材遽忝起家之命伏念臣姪男某稟訓雖久知書未深但以補署職名侍行藩鎮旣蹉跎而有素恐仕進以無階爰因誕聖之晨輒有量材之請伏蒙

尊號皇帝陛下不循常例特降殊恩賜猶子之官常念老臣之衰暮諒殺身而何報空舉族以知榮臣無任

繳連壽寧節功德疏表

右伏以河清社鳴千載啓興王之道天長地久萬邦傾祝



聖之心居留既冠於台司虔禱寧同於庶位是以集祗園  
之開士啓祕藏之真經仰讚雲天不捨晝夜鐘梵鏘洋於  
四水香花煥耀於六街預期華渚之星已滿周天之月仗  
西方之聖教祝南面之至尊庶使星望帝車與金輪而永  
固山齊聖壽歷沙劫以長存臣無任

代呂相公辭起復第二表

草土臣某言臣方處哀摧忽聞恩命泣血負罪號天自陳  
詔旨未從荒迷殆絕中謝伏念臣瘳調無狀侍養乖方於  
國於家非忠非孝不自殞滅招此鞠凶敢期苦塊之間更  
被絲綸之命伏蒙

尊號皇帝陛下曲行恩例過念遭逢雖荷寵榮恐傷風教



況古人重及親之祿君子有終身之喪且雖不才粗聞斯  
義必將負一杯之土封五尺之墳慰泉下之幽魂赴天下  
之達禮固非飾詐乃是常情伏望

陛下少抑私恩姑全大體寢茲成命俾執通喪免令不孝  
之名有辱具瞻之地臣無任叫天叩地哀號殞絕之至

代王侍郎讓官表

臣某言今日伏蒙聖慈賜臣官告一通勅牒一道特授  
臣戶部侍郎叅知政事兼加階勳爵邑者位列貳卿職叅  
四輔雖聽成命實懼曠官叫天闔而自卜遠圖讓帝澤而  
誠非飾詐中謝伏念臣才非命世學謝通儒雕虫強繼於  
家門射鵠敢希於科第不謂策名之日適當出震之期垂



衣方需於殊恩釋褐不循於常調未經歷試便立班行不出數年俄居近密佐乃聖乃神之主爲旅進旅退之人有何謨猷裨益政化至于斷決機務無非稟聽聰明尸祿居多黜幽有待雖聖情之未咎在物議而可驚豈謂

尊號皇帝陛下猥以謏才入叅大政在青壇之行慶雖舉彛章佐黃閣之持衡是爲非據而又階勲並進爵邑兼榮苟或不辭豈爲度德且陳力就列有不能則止之言惟器與名有不可假人之議願改已行之命免貽將至之殃伏望陛下特寢新恩令居舊位靡厚素餐之罪庶無覆餗之虞臣則老在諫垣終於密地永知止足敢有覬覦獲避斯權是爲多福



代呂相公讓右僕射表

臣某言今日伏奉制命授臣守尚書右僕射仍改賜功  
臣者平章三事績効無聞師長百僚恩榮不次雖聽已行  
之命實懷非據之憂伏念臣猥以常才驟逢昌運擢第偶  
叨於殊級効官徧歷於清華皆自聖知實無公望頃者入  
叅大政遂正中樞雖堅報主之心且昧化民之術炎涼屢  
換尸素彌多洎免鼎司猶居冢宰六卿分職旣首冠於班  
行五日延英但祇奉於朝請省躬知忝沒齒為榮豈意謬  
荷聖恩復登台席避讓不獲兢惶失容自再秉鈞衡遽罹  
寒暑雖身非土木粗欲荅於鴻私而職昧經綸終無裨於  
至化有辜重任罔稱具瞻固合黜自廟堂放歸田里揚于



著位以勵事君伏蒙

尊號皇帝陛下由念遭逢俯存終始特加端揆仍賜功臣  
矜其不逮之心所謂退人以禮然而中臺峻秩右相古官  
若台司無狀之人處會府彌高之位則具僚安仰後代何  
觀伏望

陛下少抑私恩顯從公議特追前詔別授散官庶使好進  
之流詎敢妄動不才之士得以小懲區區懇誠實非飾讓  
于犯宸嚴無任感天荷聖激切

為宰臣以彗星見求退表

臣某言臣聞平章百姓任繫於安危冊免三公必因於災  
異覩上玄之示譴居大位以何顏伏念臣等俱乏宏才濫



司庶政昧燹調之至理乖啓沃之嘉謨徒以先帝誤知驟  
加擢用聖君嗣統曲示優容歲月屢更弼諧無狀既失具  
瞻之望果貽覆餗之懲數日以來祇星忽見謀人之國蓋  
皇化之未孚代天之工致乾文之告變此而不責何以致  
君伏惟

尊號皇帝陛下舜孝奉先堯心稽古勵克勤之至德推好  
問之虛懷循列聖之丕基守而勿失委大臣之政柄用之  
弗疑無一事不賜詢求無一言不蒙聽納上下之情靡間  
小大之政可行所宜臻福慶於黔黎召休祥於蒼昊而星  
緯若此廟謨可知是乃元首至明股肱不稱之明驗也伏  
以君臣同體非人不居陰陽未和擢士為相乃邦家之令



典今古之彛章伏望

陛下思宗社之遠圖惜廟堂之重任旁求巖穴博採搢紳  
俯順人心上蒼天誠必生良弼用協聖猷克致和平坐銷  
變咎臣等不勝鼎足恥對朝行明降絲綸放歸田里免玷  
秉鈞之地甘為擊壤之民用此終身實為多幸臣等無任  
叨榮竊祿戰汗待罪之至

又謝恩表

臣等言近以變生乾象罪在日昃司再上封章懇避廊廟伏  
奉批荅未賜允俞中謝竊以休咎之徵繫于政教宰輔之  
任職在燮調得人則降祥非人則示譴惟天降鑒若影隨  
形伏念臣等備位三台歷事二聖既不能內安百姓使盡



關於汗萊又不能外撫四夷俾載橐橐於弓矢但妨賢路莫  
報國恩遂致和氣未融星文失度易曰又誰咎也語曰于  
汝安乎是以願罷鈞衡請求輔弼庶銷天誠克致時雍伏  
蒙 陛下荐降絲綸曲形敦諭雖未加放逐而實不遑寧  
復况避正殿於宸居減太官之常膳引萬方之罪皆在聖  
躬退三舍之祇必迴天意臣等尚容待罪彌積厚顏當主  
憂臣辱之時抱尸祿素餐之過免冠伏閭再三慮黷於天  
聰碎首糜軀萬一冀伸於臣節敢不精求理本廣察物情  
討論國經勤恤人隱議邊防之措置評刑政之弛張庶幾  
上減焦勞旁銷氛祲稍逃官謗免辱聖知區區之誠實在  
于此臣等無任感天荷聖激切屏營之至



為兵部尚侍郎謝恩表

臣某言伏奉制書入參朝政拜章陳讓答詔不從兢憂失圖龜勉就位伏念臣出于寒素偶玷科名先帝誤知驟加擢用聖君嗣統未忍弃遺在臣心而自知聽物論之難處豈謂尊號皇帝陛下特頒綸命俾佐鼎司職在弼諧事關理亂自非抱訐謨之業有變通之才上可以啓沃四聰下可以贊成三事則何以副搢紳之佇望塞宵旰之虛懷是敢具述懇誠願罷光寵陛下不移前詔終辱大恩再三慮黷於天心萬一冀傾於臣節又念兩朝近侍五稔叨榮雖覆載之恩終無補報幸犬馬之力未甚衰殘謹當知無不為退思補過調四時於玉燭誠愧昔賢誓一命於鴻



毛寧忘死地臣無任感天荷恩激切屏營之至

為溫侍郎謝除禮部尚書表

臣某言伏奉聖慈授臣禮部尚書者罷贊鼎司美遷宗伯  
推恩掩過省已慙魂伏念臣跡本孤平中非秀茂當先朝  
之踐祚遇丹陛之較文自忝科名動踰涯分驟登密勿罔  
効涓埃雖竭精誠略無獻替泊罷歸諫畧出領藩條奔走  
五年遷移四郡徇公之志中外不渝戀闕之心朝昏在望  
先皇帝召從荆渚俾佐台司未伸致主之誠遽逼上僊之  
數薄命雖在孤魂已銷伏遇

尊號皇帝陛下統嗣丕基遵承先旨特遷官秩曲示優容  
又換炎涼卒無裨補引退難輕於去就戀恩遂涉於因循



一事蔑聞兩朝冒寵宜從遠貶用戒將來伏蒙

陛下曲念遭逢特存終始峻陟六卿之列罷叅三事之權  
塵茲顯官未塞公議古人所謂進則負天下之望退不失  
六曹尚書者臣今是也南宮踈遠北極崇高欲報鴻恩未  
知死所臣無任

為兵部張相公謝官表

臣某言臣仰遵帝命再踐鼎司無非常之才負天下之望  
任重德薄以榮為憂中謝伏念臣猥以庸材驟登貴仕前  
忝三事行將二年憂畏則多輔弼無効罷歸左轄尋改正  
卿遷移數州奔走萬里屬先朝馱代方泣血於終天洎聖  
主承桃幸常叅而就日甘在散地以終此生豈謂



皇帝陛下過求舊臣曲奉先旨委以萬務冠于三台聖眷  
則隆物論未允懇疏陳讓宸慈弗俞勉就巖廊若墜淵谷  
方今皇澤雖廣黔黎未康西北邊防不無屯戍東南土俗  
亦有災傷當

陛下宵衣旰食之時責微臣富國安人之術將何智略以  
副倚毗但念生逢聖朝年過知命不敢愛死或期報恩苟  
捨短以從長庶以勞而補過涕淚兢惕不知所為臣無任

為史館李相公讓官表

臣某言伏覩制命授臣守本官平章事監修國史者台輔  
正名策書重職載循非據冒稱具瞻夙夜以來神魂飛越  
中謝伏以承天之序王者所以闡鴻猷秉國之鈞宰相所



以熙庶績代天理物負重位高苟非英賢必見墜敗伏念  
臣才非拔俗世之顯官爰自策名適逢昌運繼箕裘之業  
位以過于先臣殘臺閣之資身久妨于賢路

太宗皇帝擢參大政莫著微功冒榮則多無狀罷去

皇帝陛下初昇望苑慎擇官僚竊負護之重名佐元良之  
茂德茂聞輔導空積歲時伏遇

陛下纂嗣皇圖復陪相府送往事居之節但極哀榮庇民  
尊主之方實無措置聽于物議有玷聖猷豈謂

陛下過念遭逢時加倚注命之為相恐累知人况呂端以  
黃髮重名退居保傳李至乃青宮同列出守藩維獨臣瑣  
材當此重任乍聞綸命實駭朝端將何以踐三事之崇高



居兩朝之通顯苟昧知難之旨必貽覆餗之憂伏望  
陛下博採搢紳旁求巖穴必有經綸之器出膺宵旰之心  
惟廟堂之任得宜則祖宗之業不墜由衷斯在得請為期  
臣無任

### 第二表

臣某言自承制命尋拜封章未賜允俞不遑啓處中謝伏  
以知人安民謂之聖主度德量力謂之通賢苟冒寵榮必  
乖倚注豈獨失具瞻之望亦恐傷則詰之明伏惟

皇帝陛下負荷

二聖之基勤求萬機之務必欲化人成俗與古為徒所宜  
擇間傑之才輔文思之德然後內安百姓外撫四夷使社



稷永康揚

太祖太宗之業聖賢相遇成可久可大之功物論人心所望若此如臣斗筭小器章句諸生但以遭逢遂居通顯先皇帝擢從內署俾贊中樞莫効涓埃室更歲月洎退居散地自誓終身豈期際會儲宮列漢皇之四皓殘揚相府預虞舜之五臣當

陛下鋪張政教時是微臣傾竭謨猷之日徒有致君之志實微經國之才行將二年未立一事久妨賢路又正台司時來而身不自知詔下而人應失色伏望

陛下特迴成命別付鉅賢俾伸夔契之材用助唐虞之化庶陳力就列遂不能則止之心惟器與名得不可假人之



道言非飾讓情逼知難伏閣拜章期于得請臣無任

王黃州小畜集卷第二十四



開化圖書館  
Kankwa library



王黃州小畜集卷第二十五

牋啓

賀皇太子牋

皇太子賀正牋

皇太子賀冬牋

謝除右拾遺直史館啓

謝除左司諫知制誥啓

謝除禮部員外郎知制誥啓

謝除翰林學士啓

謝除刑部郎中知制誥啓

上宰相謝免判吏部南曹啓



迴寇密直謝官啓

謝僕射相公求致仕啓

迴司空相公謝官啓

迴孫何謝祕書丞直史館京西轉運副使啓

薦戚綸上翰林學士錢若水啓

迴尹黃裳啓

賀皇太子牋

某言今日日降到赦書一道皇太子殿下光膺冊命正位  
諸宮凡在普天不勝大幸伏以三代舊章百年墜典舉茲  
盛禮允屬昌朝伏惟殿下稟氣塗山誕祥甲觀蘊間平之  
茂德早冠親賢邁啓誦之多才式當儲副既協人神之望



永隆邦國之基某謬忝專城嘗叨內署正衙宣冊陪駕序  
以無階僻郡効官拜龍樓而尚遠無任抃躍

皇太子賀正牋

某言伏以元正首祚萬物咸新趨北闕以朝天啓東宮而  
應律伏惟皇太子殿下重輪發彩少海澄波蘊克勤克儉  
之風著惟孝惟忠之節王畿千里隨木鐸以行春君門九  
重捧金壘而上壽應時納祐與國同休某權佩魚符遙瞻  
雞戟無任

皇太子賀冬牋

某言伏以晷運推移日南長至啓東朝而受賀爰舉舊章  
指北闕以稱觴率先群后伏惟皇太子殿下日躋盛德天



小書集卷之三  
吾所藏神金  
縱多才忠孝克奉于君親謙讓動詢于師友寢門侍膳誕  
彰三至之勤望苑禮賢永作萬作之本應時納祐與國同  
休某叨列通班爰當亞歲無任抃踊

謝除右拾遺直史館啓

右某啓蒙恩特授前件官充職者位列諫垣職兼史氏雖  
聽已行之命難逃非據之言祇荷寵榮不任感懼恭以獻  
箴規於諫署必待正人彰善惡于史書宜歸直筆矧茲庸  
賤遽有忝塵伏念某門第本寒才華不秀鄉庠里塾從師  
而纔識姓名畫地書空力學而稍通經史明代方求于翹  
楚高堂漸逼于垂榆因持濫吹之筭來示藏家之篋雖春  
官與進荐叨隗始之名而明主求人果失盧前之望然而



紫庭擢第白屋知榮衡茆菴丹桂之香布素曳出藍之色  
里閭改觀親族生光洎邑佐絃歌任移銅墨廷評乃士官  
之屬不謂冗僚縣事則諸侯之權豈言下位甘隨常調敢  
歎徒勞固無易俗之能惟待黜幽之典豈期賤吏誤達宸  
聰把籬畔之菊花方多憔悴近階前之奠莢頓覺光輝而  
又召詣黃扉顯加明試深虞固負有負品題序賀雪之詩  
因多膚淺賦履冰之什愈見荒唐既有黷于宸嚴詎敢期  
于天獎方在端憂之際忽驚非次之恩芝函乍降于人窠  
棘寺驟歸于諫署職兼館殿地極清華通宵未息于征忪  
詰旦遽諧于告謝綠袍褫處休貽碧鶴之譏朱紱紆來但  
負維鶉之刺儻忽忘而簡橫象齒耀搢紳而帶飾犀文荷



王澤之霑濡空驚泱背對天顏之咫尺惟誓殺身夫何寒  
賤之人有此遭逢之事此皆相公尼丘借峻文曲生光數  
仞墻邊暗展鑄顏之力如椽筆下潛施與點之恩遂令清  
切之資光被孤平之士亦猶泝泝為事遽邀列地之封鷄  
鷓呈災誤享鈞天之樂願藝行之無取荷生成之有歸得  
不慎守當官恪供其職况無遺之可述拾幸有瑞而必書  
編修出綽之言垂于信史撰著得賢之頌播在樂章少施  
染削之勞上答受知之地過此已往未知所裁

謝除左司諫知制誥啓

右某啓蒙恩特授前件官充職者位遷中諫職列西垣祗  
荷寵光不任感懼竊以伏青蒲而獻可合求補衮之才吟



紅藥以擣詞尤重演綸之地豈期庸賤玷此清華伏念某  
才非秀民世本寒族適會文明之運濫肩任進之流參常  
調以起家永甘縣吏寘周行而通籍俄在諫垣加以叨館  
殿之清資預校讎之美職以日繫月方期讀天下之書自  
適陟遐不意禁掌中之誥載循所自必有攸歸此皆相公  
文曲分光才江借潤遂使自天之命詎求批鳳之才列地  
而封翻及不龜之手得不更精文翰上答品題恪事一人  
少贖素餐之咎虔遵四禁用疇黃閣之知過此以還未知  
所措卑情不任感恩榮懼終始知歸之至

謝除禮部員外郎知制誥啓

右啓某蒙恩特授前件官充職者卧錦握蘭忝名曹于南



省含香視草復舊職于西垣祇荷寵光不任感懼伏念某  
性惟拙直族本單平達逢天下之文明遂擢御前之科第  
雍熙中自百里被召拾遺立朝伏蒲昧五諫之名汗簡乏  
三長之譽方虞官謗遂掌綸言書堯舜之典謨文非逮意  
厠淵雲之侍從路實妨賢歸田園而蓋戀盛時踐臺閣而  
頗為非據邇後以執法無狀蒙恩黜官八六里之窮山得  
二車之散秩去歲量移善地甄叙通班貼文館以儻書奉  
皇華而按獄屬以高堂垂老懸罄屢空懇求郡國之權以  
就庭闈之養阮宣無食故拜官而不辭毛義有親方捧檄  
而私喜未遑布政忽忝歸朝十五日之專城焉知民瘼一  
千年之昌運荐辱君恩歷數前賢鮮茲盛事昔憲宗覽表



移韓愈于潮陽文帝經年負賈生于湘浦比斯遭遇可謂  
殊尤况帳爛錦窠塔翻藥樹爰循故事無此兼榮遠則和  
魯公已歷儀曹退居主客近則趙給事拜從起部改授小  
徑是何繼王兵部之清塵舉太祖朝之近例更直紫薇之  
署已覺忝塵絕曹玉筍之班併居清切感極而空成涕泗  
寵兢而在如夢魂青瑣窻開再見壺中之日月朱衣吏引  
猶疑澤畔之形容謬恩雖自于聖知公議終騰于衆口此  
盖相公洪鈞造物青律迴春用材而木屑無遺念舊而著  
簪靡弃遂使蒼苔入詠復預于詞臣死灰再燃無慚于獄  
吏敢不慎修儒行演暢皇猷庶憑翰墨之功少答陶鎔之  
力卑情



謝除翰林學士啓

右某啓伏奉制命特授守本官知制誥召入翰林充學士者祇荷寵光不任感懼伏以漢朝故事待詔甘泉之宮唐室舊儀召對浴堂之殿自非枚馬淵雲之述作常楊元白之才名則何以塞清問于論思潤皇猷于典誥豈宜孤陋遽此忝塵伏念某植學非深屬文無取濫中懸科之選尋叨通籍之班諫署拾遺謬無裨于聖主承明三入清華空類于昔賢頃因坐事以左遷固亦息心于榮路洎得歸朝之命遂求典郡之官去年召自琴臺再陞綸閣驟荷一人之寵遇果罹三歲之凶喪雖勉就于奪情實重違于素志顧潘安之毛髮已有雪霜念季路之旨甘不如藜藿臨



文翰而方寸亂矣對播紳而面目何為想石初子之執喪  
空漸至行比歐陽通之起復尚欠禮文止期卜兆于松楸  
再請劾官于符竹豈意未諧私願俄辱殊恩翻令朽退之  
身亦預深嚴之地綸言乍降俾離紅藥之階宸翰高懸已  
踐玉堂之地哀榮交集寵辱堪驚副重華好問之心先憂  
學寡草武帝求賢之詔更愧才難通宵未息于戰兢舉步  
猶疑于魂夢此皆相公洪鈞造物青律迴春徵賈誼于謫  
官終成前席薦相如之視草幸得同時敢不四禁是遵三  
緘是誠况艱難備歷齒髮始衰用直道以事君雖無改變  
肆剛腸而疾惡漸亦銷磨庶寡悔尤少酬知己下情無任  
感戴兢榮始終知歸之至



謝除刑部郎中知制誥啓

右某啓伏蒙聖恩特授前件職者一麾出守左遷方類于  
阮咸三入承明寓直忽同于應璉祗膺寵命伏積兢崇竊  
念某猥以腐儒受知先帝踐揚兩制出處九年自知賦命  
之多奇每愧浮口之過實軍容捧硯敢望輝榮力士抹靴  
遽騰于謗議而自臨民滌上移任淮南飾厨傳以屢空勾  
簿書而弗逮受釐宣室重求前席之期燒藥鼎湖忽起攀  
麟之念心灰自死淚血無從屬當明主之承乾尚代藩臣  
而守土尋以拜章言事解印歸京覩七月之園陵魂銷弓  
劍隨百官而朝謁目斷雲天放懷書史之間結舌搢紳之  
內皂囊無取慚越職于伏蒲白首為郎甘息心于執戟雖



知止足猶阻歸休欲耕季子之田園曾無二頃謀葬劉鍾  
之親屬何啻十喪終為懷祿之人蓋逼有身之患豈謂內  
庭論薦黃閣僉諧迴天眷之新恩復王言之舊任塔前藥  
樹重吟謝客之詩觀裏桃花免動劉郎之慕詠此皆某官  
激揚公議啓迪宸聰洪鈞豈有于弃材化筆潛徵于故事  
謂李杓直翰林退職復踐掖垣白居易禁署出官終知制  
誥享茲殊事實越昔賢驅瓜上之青蝇雖非由徑之夢中  
之白鳳深愧演綸敢不考三代兩漢之典章取貞元長慶  
之風格或少窺于邊徼庶上答于陶鎔卑情無任感恩荷  
德激切知歸之至

上宰相謝免判吏部南曹啓



右某啓奉今日勅差判吏部南曹尋蒙抽取元勅者伏  
以演綸西掖乃王者之詞臣按吏南曹本天官之下士遽  
蒙改易深荷陶鎔伏念某比之時才濫塵清列蒼苔紅藥  
但遵四禁之文理劇劇繁久絕五花之判便于散拙樂在  
清閑忽奉遣差頗增憂畏固非耻于卑賤蓋亦事有彛倫  
且念判曹之名起于總章之後罷負外轉廳之事為尚書  
役屬之司勾群吏之稽違奉三銓之指顧顯為統攝自有  
禮容豈可職銜帶制誥之文公狀具尊卑之數雖知不便  
未敢固辭豈謂相公曲為敷揚俾諧停寢全臺閣之故事  
實亦公行荷廟廊之殊知且非私謁永懷感遇空極兢榮

迴寇密直謝官啓



右某啓伏以應星辰而虞山澤華省名郎直宥密而預機  
宜黃樞近職兼茲重柄允屬鉅賢學士學植凌雲詞源沃  
日澤宮中的科名先繼于箕裘諫署曳裾章疏獨推于謇  
諤縱橫時務輝映士林佐理計司解九牛而又穎直言便  
殿折五鹿以詞雄故得峻陟中臺榮升密地稱天心之則  
哲動時論于得人而又南面聽朝特頒金紫東銓求理專  
委品題佇從三節之榮便叙九功之業某幸叨知獎方切  
依棲自草芝泥最先栢葉悅豈謂學士曲迴謙柄俯賜華  
牋目窺星斗之文章身負刺芒之休惕欽隆感戴藪集所  
懷卑情不任

謝僕射相公求致仕啓



右某啓伏以懸車告老大夫七十之期名遂退身老氏五千之說其或當尚齒尊賢之代有經邦鎮俗之才雖在期頤式存倚注縱止足之心自許執禮無違奈弼諧之任惟艱非賢不乂伏惟僕射相公受天和氣為國善人三朝文翰之司丹青帝典再領燮調之任提振皇綱昨以久處台司重煩耆德事均勞逸輟萬務之憂勤位保崇高為百僚之師長永言端揆之任舊稱廊廟之官垂行三入之恩求贊千年之運豈謂浮雲富貴脫屣簪裾拜章既達于冕旒洒翰徧貽于臺閣是何末品亦辱台函初謂誤傳終知殊賜兢惶無措拜受失容見大儒之用心循先聖之彛訓不獨辭于世祿亦將激彼時風然而上揣宸心旁徇公議咸



謂老成之德宜居輔弼之先捕虎逐麋雖鬻熊之已暮為霖作礪非傳說以何歸况鍾洪範之康寧宜念蒼生之窮困竚覩白麻天降促追振鷺之班黃閣開洞重見棲雞之樹社稷之謀是展君臣之分弥隆與邦國以同休書簡編而增耀斯為善頌且匪虛談下情無任

迴司空相公謝官啓

右某啓伏以引年納祿達人知進退之宜養老優賢王者得始終之道君臣之義今古同風伏惟司空相公受天至知為國重器皇墳帝墳咸歸潤色之功禹畫堯封盡被陶鎔之力位崇百揆年俯七旬宸心方倚于老成達識遽辭于榮祿聖人上遂其願養峻以階資鳳皇之池暫虛于舊



位鳴鳩之秩聊示以新恩解簪紱以如遺指林泉而自樂  
功成名遂早知身退之機漏盡鍾鳴堪笑夜行之者然而  
四海有具瞻之任三公非致政之官激浮躁之風式旌素  
節委弼諧之任終復黃扉凡在搢紳皆傾禱頌猥蒙鈞造  
先賜台函仰欽止足之規弥荷謙尊之德卑情無任

迴孫何謝祕書丞直史館京西轉運副使啓

右某啓伏以列中祕圖書之府貳外司漕運之權惟是才  
難允歸公議學士文同三代名冠四科擅場早達于天聰  
獨行不隨于時態輕芻蒞之雜伯浪取帝師慕孟子之著  
書力談王道暫停坐棠之政尋升汗簡之資閨籍通班式  
耀獲麟之筆轉輸副務更觀流馬之功方切欣怡忽承緘



翰備認謙冲之旨彌增銘荷之誠衣錦畫行雖勞于按部  
演綸夜直願効于前驅謹奉啓

薦戚綸上翰林學士錢若水啓

右某啓某有進士同年戚綸者負文章器識純謹君子也  
其先君通五經教授于濰陽終身不求聞達兄維國初登  
進士上第有文有行守道不拘游宦三十餘年今為殿中  
丞綸擢第亦一紀矣歷主簿縣尹得大理評事光祿丞司  
權酷于醮郡非其樂也向因讞獄寃丘坐繫烏府廷尉議  
罪聽以贖論既釋之矣或以前罰未塞又奪其官今會赦  
文合從叙用寓止佛寺出無車馬冒犯風雪袖文相過有  
理道評十二篇味之非空言也然而辭直意切急于救時



若無知心亦恐騰口以為失路而造謗也尊道之士其將  
捨諸恭惟學士才與位并道與時會力開賢路之梗手築  
聖域之基指紳顯有所仰賴其罪在擯弃恩出推挽未  
能報德尚復言人蓋非學士之門不敢失綸之言賈綸之  
毀也語曰善人在患飯不及餐區區之心實愧斯義謹修  
啓事并封綸所著凡若干凡閣視草之暇賜觀覽則綸也  
幸甚謹

迴尹黃裳啓

右某啓伏以諫垣清秩綴螭頭侍從之班史氏設官修麟  
筆不刊之典享茲清切允屬英翹正言學士學富百家文  
窮三變挂籍先鳴而擅譽栢臺持憲以生風近者金闕獻



書召試王褒之頌石渠載筆更伸班固之才凡在立朝共  
欣得儁猥蒙殊念特示長牋載窺彪炳之文益認謙冲之  
旨欽隆佩服併集所懷謹修啓事陳謝

王黃州小畜集卷第二十五



開化圖書館  
Wahua library



開化圖書館

Kaichua library



開化圖書館

Kaichua library





開化圖書館


Kaithua library



開化圖書館

Kaishwa Library





小  
畜  
集  
五


開  
他  
圖  
書  
館  
K  
a  
r  
n  
a  
L  
i  
b  
r  
a  
r  
y





開化圖書

Kaishua Library



Centimetres

**TIFFEN** Color Control Patches

© The Tiffen Company, 2007

Blue

Cyan

Green

Yellow

Red

Magenta

White

3/Color